

# Marcos

## Ñotsse Condase'cho Jesucristone

---

Feti'su Juan a'ima candusian

(Mt 3.1-12; Lc 3.1-9, 15-17; Jn 1.19-28)

- 1** 1Qquen tsu Jesucristone ñotsse condase'choja ashaen. Tiseja Chiga Dutssi'ye tsu.  
2Tayopi Chiga Aya'fama afa'su Isaíasja Chiga su'choma qquen tevaen:  
  ¡Que canjan! Quema o'tie gi moeña ña mandasi afa'suma que  
  jiya'chove ñoñañe.  
3 A'i aya'fama qui paña'faya a'i menia'ñe qquen fundo'je'choma:  
  “Na'su jiya'chove ñoña'faja.  
  Tise tsaiquima tansianqquia'caen que'i injama'choma tansian'faja.”  
4Juan a'ima feti'su ji a'i menia. Jipa qquen candusian:  
  —Majan ño'ame daye in'jamba tise in'jangae canse'choma catiye in'jan'da  
  ñotssi tsu fetiyeye. Chiga tsu que'i egae tsincon'choma joqquitssiaña.  
5Poiyi'cco Judea ande'su a'i, Jerusalén canqque'su a'l'qque jiji'fa. Tise'pa  
  egae canse'choma condase'fasi Juan Jordán na'enga tsendeccuma feti.  
6Juan ondiccu'jeja camello tosema otata'cho. Tise utuqui'faja ttono utuqui'fa.  
Tise anqque'suja ttombu, tsampi'su tuño cuñajun'cho'qque. 7Juan candusiamba su:  
  —Ñama omboe tsu jiya ñama ti'tsse'tssiaja. Ñajan utu'ccoapa gi shaca  
  tise sapatoma uga'choma ccupa'suve ca'niñe. 8Tsa'lcui'ccu gi que'ima  
  feti'je. Tsa'ma tise jipa Chiga Qquendya'pai'ccu tsu que'ima fetiya.

Jesúsma feti'cho

(Mt 3.13-17; Lc 3.21-22)

- 9Tsensi tse'i Jesúsja Galilea ande'su Nasaret canqquene ji. Jisi Juan  
  Jesúsma feti Jordán na'enga. 10Jesúsja na'eñe sombojipa sefacco  
  fettaye'choma atte. Chiga Qquendya'pa ppuppuju'choa'caen tisenga andeji.  
11Tsa'caen andej'i ni Jesús sefaccone afa'choma paña qquen su'choma:  
  —Que qui Ña Dutssi'ye, Ña In'jan'cho. Quene gi avujatssi.

**Satana Jesúsma qqueña qquen tson**  
*(Mt 4.1-11; Lc 4.1-13)*

<sup>12</sup>Tse'faei'ccuyi Chiga Qquendya'pa Jesúsma manda moen a'i menia.  
<sup>13</sup>Jesúsja cuarenta a'tave tseni can'jen. Tsenijan osha'cho ttesiaca'moa  
 can'jen'fa. Tseni can'jensi cocoya na'su, Satana, jipa Jesúsma qqueña  
 qquen tson. Tsa'ma Chiga sefacconi'su shondosundeccu Jesúsma coira'je'fa.

**Jesús Galileani condaseye ashaen**  
*(Mt 4.12-17; Lc 4.14-15)*

<sup>14</sup>Ande na'su Herodes tayo Juanma indipa piccosi Jesús Galileani japa Chiga  
 aindeccuve daya'chone ñotsse condase'choma candusiañe ashaen. <sup>15</sup>Jesúsja su:  
 —Tayo tsu napiji. Ti'tssecan tsu napiya Chiga aindeccuve daya'choe.  
 Que'i in'janga canse'choma catipa ño'amé daye in'jan'faja. Tsa'caen  
 in'jamba va ccushaya'chone ñotsse condase'choma in'jan'faja.

**Jesús avu vachosundeccuma ttu'se**  
*(Mt 4.18-22; Lc 5.1-11)*

<sup>16</sup>Jesús Galilea mar otafa'yé jayipa Simón, tise quinshin Andrésma  
 atte. Tsendeccuja avuve vachoye atesundeccupa vacho'je'fa. <sup>17</sup>Jesús  
 tise'pama atepa su:

—Ñai'ccu jipa jacañ'faja. Ña gi tsoña que'imajan avuma ttuqquia'caen  
 a'ima ttu'sesundeccuve.

<sup>18</sup>Qquen susi tise'pa vacho'vama catipa Jesúsi'ccu ja'fa.  
<sup>19</sup>Ti'tsse joccani jayipa Santiago, Zebedeo dutssi'ye, tise quinshin  
 Juanma'qque atte. Tsendeccuja shavoni dyaipa vacho'vama uga'je'fa.  
<sup>20</sup>U'gá dyai'fasi Jesúsja tsendeccuma'qque ttu'se. Tsonsi tise'pa yayama,  
 semasundeccuma'lqque shavonga catipa Jesúsi'ccu ja'fa.

**Cocoya ca'ni'cho a'i**  
*(Lc 4.31-37)*

<sup>21</sup>Napi'fa Capernaum canqueni. Tsomba sema'ma'lqquia a'la Jesús Chiga  
 manda'choma atesian'jen'ttinga ca'nimba atesian'jen. <sup>22</sup>Jesús atesian'jensi a'i  
 pañamba can'boen'fa. Tevavaensundeccua'cambipa na'sia'caen tsu atesian'jen.  
<sup>23</sup>Tsa'caen tson'jen'ni cocoya ca'ni'cho a'i atesian'jen'ttinga ca'ni. Ca'nimba fundo:

<sup>24</sup>—¿Mincoñe qui ingingata ji, Jesús Nasareno'su? ¿Ji ti qui ingima  
 sefaeñe? Ñanda gi quema atesu. Queta qui Ño'a Chigani'su.

<sup>25</sup>Qquen susi Jesús cocoyama iyu'upa su:

—¡Ziyaja! ¡Joqquitssija va tsandie'ye!

<sup>26</sup>Tsa'caen susi cocoyaja tsa a'ima pan'jaemba quia'me fundopa  
 somboin ja. <sup>27</sup>Somboin jasi a'i pa'cho qquendyasi poiy'cco a'i dyopa  
 can'boen'fa. Tsomba tisupanaccu iñajampañacco'fa:

—¿Jongoesu tsu vaja? ¿Jongoesu tsu va cuname atesian'jen'cho? Jovaja ti'tsse'tsse manda. Nane cocoyandeccuma'qque iyu'usi tisema paña'fa.

<sup>28</sup>Tse'fai'ccuyi poiyi'cco tsa Galilea ande'su aindeccuja Jesúsne paña'fa.

### Simón chancashema ccushaen

(Mt 8.14-15; Lc 4.38-39)

<sup>29</sup>Chiga manda'choma atesian'jen'ttie sombopa Simón, Andrés Jesúsi'ccu tisupa tsaoni jay'i'fasi Santiago, Juan'qque jaja'fa. <sup>30</sup>Tseni japa Simón chancashema atte, ajepa pajipa ccui'choma. Tsensi attepa Jesúsnga conda'fa. <sup>31</sup>Pañamba Jesús paj'i'sunga catsepa tive'ye indipa jangian. Tse'fai'ccuyi aje chattian. Aje chattiansi tsa pushesuja poiyi'cconga cui'ña.

### Jesús pajisundeccuma ccushaen

(Mt 8.16-17; Lc 4.40-41)

<sup>32-33</sup>Tayo sime, chiga amppisi, sema'ma'lquia a'la pasasi poiyi'cco tsa canqque'su a'li tsa'o sombo'ttinga bo'fa. Pa'cco pajisundeccuma, cocoya ca'ní'chondeccuma'qque Jesúsnga i'fa. <sup>34</sup>I'fasi Jesús tsain'bitssia osha'choi'ccu pajisundeccuma ccusha'shaen. Tsain'bitssia cocoyama'qque joqquitssian. Tsa'caen ccusha'shaemba Jesúsja cocoya afaye se'pi, tisema atesuchosi.

### Jesús Galileani japa candusian

(Lc 4.42-44)

<sup>35</sup>Tsomba a'taningae, toya sinttia'ni Jesús jangipa ccani ja, a'i menia, Chigama iñajañe. <sup>36</sup>Tisema attembe moemba, Simón, toya'caen tisei'ccu can'jensundeccu'qque, Jesúsve ttattacan'fa. <sup>37</sup>Ttattacamba attepa su'fa:

—Poiyi'cco tsu queve ttattacan'fa.

<sup>38</sup>Tsa'ma Jesúsja su:

—Jinge ccani jaye, faesu canqque, faesu canqquenga ñotssiave candusiañe. Tsa'caen in'jamba gi vani ji.

<sup>39</sup>Tsa'caen supa pa'cco Galilea andenga jacon. Tsa'caen jacamba pa'cco Chiga manda'choma atesian'jen'ttinga japa candusian. Cocoyama'qque joqquitssian mañajan.

### Na congomba paji'choma ccushaen

(Mt 8.1-4; Lc 5.12-16)

<sup>40</sup>Tsa'caen tson'jen'ni fae tsandie, na congomba paji'cho, Jesúsnga catsepa ccarupa dyaipa su:

—Que in'jan'da qui ñama ccushaeñe osha.

<sup>41</sup>Tsa'caen susi Jesús tisema mende'yepa tivei'ccu yasapa pporaemba su:

—In'jan gi. Tayo qui ccusha.

<sup>42</sup>Jesús tsa'caen susi tse'fai'ccuyi tise na giya'tsse dapa ccusha. <sup>43</sup>Tse'i Jesús tisema qquen iyu'upa manda moen:

<sup>44</sup>—Que canjan. Majangayi'qque condambeyi jaja Chigama afa'suni. Tseni japa tisuma tisenga canjaenjan. Canjaemba Moisés tayopi mandaqqui'a'caen ccusha'chone afeya'choma Chiganga afeja. Tsa'caen afeja cuintsu poiyi'cco a'i in'jan'faye que ccusha'choma.

<sup>45</sup> Tsa'ma tsa a'i ccushapa jayipa condasé ja. Poiyi'cconga condase ma'caen da'choma. Tsa'caen tsonsi Jesúsjia canquenga ca'niñe oshambi a'i panshaen tisema atteye in'jamba bo'fasa'ne. Tsa'ma ccafeyi a'i menia jaca'ni'lqque tseni poiyi'cco a'i bo'fa, tisema atteye.

### Ishopa paqque'suma ccushaen'cho

(Mt 9.1-8; Lc 5.17-26)

**2** <sup>1</sup>Tsomba tse'i, boyi a'tangae, ccase Jesús Capernaumni ji. Jisi tse'tti'su a'i paña'fa Jesús tsaoi can'jen'choma. <sup>2</sup>Pañamba tsain'bio a'i sombo'ttima'qque on'ba'e bo'fa. Tsa'caen bo'fasi Jesúsjia Chiga Ayafama atesian'jen. <sup>3</sup>Tson'jen'ni ishopa paji'suma Jesúsga i'fa. Cuatro a'i tsa paji'suma andú i'fa. <sup>4</sup>Tsa'ma Jesúsga catseye osha'fambi panshaen a'i bo'fasi. Catseye oshambipa tsa'o tansinfa'su ppappacconga ansundepa tsene fettafa Jesús ccutsu'cho tansintsse. Tsa'caen fettapa tsangaé a'i paji'choma tise ana'jen'chonga andian'fa Jesús ccutsu'ttinga. <sup>5</sup>Jesús tsama attepa tise'pa in'jan'choma in'jamba ishopa paji'suma su:

—Jaricho, que egae tsincon'choma tayo joqquitssian.

<sup>6</sup>Tsa'ma majan Chiga manda'choma atesiansundeccu tse'tti dyaipa in'jan'fa: <sup>7</sup>“¿Jongoesie tsu jova tsandieja ya'caenjan su? Egae tsu afa'je. ¿Majan tsu oshaya egae tsincon'choma joqquitssiañel'jan? Nane Na'su Chiga Quitsayi tsu oshaya.” <sup>8</sup>Tsa'ma Jesúsjia tise'pa in'jan'choma atesupa su:

—¿Jongoesie qui injama'choni tsa'caen in'jan'fa? <sup>9</sup>Tayo gi su: “Que egae tsincon'choma tayo joqquitssian.” ¿Bove aiye'pambi ti qquen suye: “Jangipa que ana'jen'choma isupa tsui jaja que tsaoni”? <sup>10</sup>Tsa'ma Na'su Chigaja antte Sefaccone Ji'cho Al'ija egae tsincon'choma'qque joqquitssiañe. Ñaján sefaccone jipa tsa'caen oshapa que'inga canjaeñe tson'jen.

Qquen supa paji'suma su:

<sup>11</sup>—Quema gi su: Jangipa que ana'jen'choma isupa jaja que tsaoni.

<sup>12</sup>Tse'fai'ccuyi paji'suja jangipa tise ana'jen'choma isupa tse'ttie sombopa ja. Poiyi'cco a'i tsama atte'fa. Attepa can'boen ccutsupa Chigane ñotsse afa'fa qquen supa:

—¿Minga'ni'lqque atte'fambi gi qquia'ma?

### Jesús Levíma ttu'se

(Mt 9.9-13; Lc 5.27-32)

<sup>13</sup>Tsomba Jesús tsene sombopa ccase mar otafani ja. Tseni jasi poiyi'cco a'i tisenga bo'fa. Bosi Jesús tise'pama atesian. <sup>14</sup>Atesian nanimba govierno impuestoma isu'je'ttima panshamba Levíma atte. Tiseja Alfeo dutssi'ye tsu. Impuestoma isuye dyaisi Jesúsjia tisema ttu'se:

—Jija ñai'ccu.

Ttu'sesi Leví jangipa Jesús'i'ccu ja.

<sup>15</sup> Tsonsi Jesús Leví tsaoni japa an'jen'cho mesa jin'tti piyive ccuipa an'jen.

Toya'caen tsain'bio impuestoma isusundeccu, egae tsinconsundeccu'qque jipa fae'ngae Jesús, tisema shondosundeccu'ccu piyiccuipa an'jen'fa. Nane tsain'bio tsendeccu'su Jesús'i'ccu jacañ'fa. <sup>16</sup> Tsonsi Chiga manda'choma atesiansundeccu, fariseondeccu'qque tsama attepa Jesúsma shondosundeccuma iñajampaña'fa:

—¿Micomba tsu que'ima atesian'suja va impuestoma isusundeccu'ccu, egae tsinconsundeccu'ccu amba cui'je?

<sup>17</sup> Jesús tsama pañamba su:

—Pajimbi'choa ccushaen'suma in'jambiqquia'caen ñajan jimbi gi tayo ño'a qquen in'jan'chondeccuma ccushaeñe. Tsa'ma ccushaen'suja paj'i'suma ccushaeñe jiqliquia'caen ñajan egae tsinconsundeccuma ccushaeñe gi ji.

### Ambe'yi asettu'chone atesian'cho

(Mt 9.14-17; Lc 5.33-39)

<sup>18</sup> Feti'su Juanma shondosundeccu, fariseoma shondosundeccu'qque ambe'yi asettuye atesu'fa Chigama iñajañe. Tsonsi cca'indeccu Jesúsnga jipa iñajampaña'fa:

—¿Micomba tsu Juanma shondosundeccu, fariseoma shondosundeccuja zutsse ambe'yi Chigama iñajan'ma quema shondosundeccuja tsa'caen asettu'fambi?

<sup>19</sup> Qquen iñajampañasi Jesúsja su:

—Tsandie pusheye tson'jemba a'ima ttu'sesi bojin sheque'ta ¿ma'caen tsu ambe'yi asettu'faya? Nane tsa tsandie toya can'jen'ni tsu fae'ngae tisei'ccu avujatsse amba cui'je'fa. Ña gi tsa tsandieca'on ja'ño can'jen.

<sup>20</sup> Tsa'ma maqui a'ta cca'indeccu tsandiema tise'pa'ye joquitssiansi tsequi tsu ambe'yi asettu'faya'cho.

<sup>21</sup> A'ija cuna sarupai'ccu tssoru ondiccu'jema pi'pimbi. Nane qquen tson'da ondiccu'jema ñoñañe in'jamba tsu ti'tsse dañoña. Ma'ppa'ninda, cuna sarupaja zuruchopa tsu ti'tsse tssorumma chittaeña. <sup>22</sup> Toya'caen tsu a'ija vinoma cupoemba tssoru ttono botiyanga fiñaña'bi. Vinojan omppantssimba ttonoma chi'ttapa tsu catiyeya. Toya'caen ttono'qque tsangae tsu dañongeya. Tsa'ma cuna vinomanda tsu cuna ttono botiyanga fiñaña'cho.

### Sema'ma'qquia a'ta sinttipa an'fa

(Mt 12.1-8; Lc 6.1-5)

<sup>23</sup> Tse'i Jesúsja sema'ma'qquia a'ta nasipa'yé panson jayi. Jayipa tisema shondosundeccuja qquipoe'supa trigoma sintti isupa shuju qque'shoembra aña ashaen'fa. <sup>24</sup> Tsonsi fariseondeccu attepa Jesúsnga su'fa:

—¡Canjan! ¿Jongoesie tsu quema shondosundeccuja qquen sema'jen'fa? Nane Chiga manda'cho tsu se'pi sema'ma'qquia a'ta tsa'caen semañe.

25 Tsa'ma tiseja su:

—¿Can'fambi ti qui Chiga Aya'fangae tayopi'su David tson'choma? Tiseja tisei'ccu jacansundeccu'qque qquipo'e'su'fa. 26 Tayopi'su Abiatar Chigama afa'su na'suite David qquipo'e'supa Chiga ettinga ca'nimba Chiganga afe'cho panma isupa an. Nane tsesu panmajan Chigama afasundeccuyi an'faya'cho. Chiga manda'choja se'pi faesu a'i aña. Tsa'ma David amba tisei'ccu jacansundeccunga'qque afe. Afesi isupa an'fa.

27 Toya'caen tsu Jesúsja su:

—Sema'ma'qquia a'taveja a'ima fuiteye tsu antte. Tsa'ma tsa a'tama Chigaja anttembi a'i panshaen se'piye. 28 Tsa'cansi Sefaccone Ji'cho A'i gi sema'ma'qquia a'ta se'piye manda'choma ti'tsse'tssia.

**Tive samba dañonge'cho a'i**  
(Mt 12.9-14; Lc 6.6-11)

**3** 1 Faesu sema'ma'qquia a'ta Jesús Chiga manda'choma atesian'jen'ttinga ca'ni. Tse'tti tsu fae tsandie, tive samba dañonge'choja ccutsu.

2 Cca'indeccuja ron'da dyai'fa Jesús sema'ma'qquia a'ta ccushaen'ninda "Queja egae tsincon" qquen suye. 3 Tsonsi Jesús tive dañonge'choma su:

—Jangipa jipa ccutsuja enttingenga.

4 Tsomba cca'indeccuma iñajampaña:

—Chiga manda'chota sema'ma'qquia a'ta egae tsoñe se'pisi ¿ñotsse tsoñe'ta ti ñotssi? Fi'ttiye se'pisi ¿ccushaeñeda ti ñotssi?

Tsa'ma tise'paja afambe ziya'fa. 5 Tsonsi Jesús piyicamba iyicca'yepa ñombi'ye, tsendeccu injama'cho shacapa in'jan'fambisi. Tsomba pajil'suma su:

—Yasaja que tivema.

Yasapa tise tiveja ccusha. 6 Tsonsi fariseondeccu sombopa na'su Herodes aindeccui'ccu condasecco'fa ma'caen Jesúsma osha'ta fi'ttiye.

**Mar otafani Jesús a'ima atesian**

7 Jesúsja tisema shondosundeccui'ccu mar otafanga ja'fa. Tsain'bio Galilea ande'su a'i Jesúsi'ccu jaja'fa. 8 Judea ande'su'qque jaja'fa. Nane Jerusalén canqque'su, Idumea ande'su, Jordán na'en jonifani'su, Tiro, Sidón canqque pporotsse can'jensundeccu, nane pa'o a'i Jesús tson'choma pañamba can'su jaja'fa. 9-10 Jesús tsain'bio a'ima ccushaensi atepa faesu pajisundeccu'qque tisema pporaeñeda ji'fa pporaemba ccushaye. Tsa'caen ji'fasi Jesúsja tisema shondosundeccuma manda cuintsu shavoma i dusiamba ronda'je'faye a'i panshaen bosi tsanga otsey'a'choe. 11 Tsa'caen tson'jen'ni majan cocoya a'inga ca'nimba can'jen'cho Jesúsma atepa tise tsovejufanga ccaru dyaipa qquen fundo'fa:

—¡Queta qui Chiga Dutssi'ye!

12 Tsa'ma Jesús tise'pama iyu'upa se'pi:

—Majangayi'qque tsa'caen conda'fajama.

**Doce shondosundeccuma ttu'se**  
*(Mt 10.1-4; Lc 6.12-16)*

<sup>13</sup>Jesúsja ccotta'cconga ansundepa tise in'jan'chondeccuma ttu'se. Ttu'sesi Jesúsnga jílfa. <sup>14</sup>Nane doce a'live tsu ttu'se tisei'ccu jacañfaye; tise mandasi ccani japa candsianfaye. <sup>15</sup>Toya'caen Jesús tsendecunga antte cuintsu tisia'caeñi pajil'suma ccushaeñ, cocoyama'qque joqquitssiañe osha'faye. <sup>16</sup>Tsendeccu tsu Jesúsma doce shondosundeccu. Tise'pa inise tsu qquen: Simón (tsayi Pedro qquen inisecho'cho), <sup>17</sup>Santiago, toya'caen tise quinshin, Juan (va dosja Zebedeo dutssiyendeccu –tsendeccuveyi co'fepa inisian'fa Boanergesve– tsanda dushundeccu qquen tsu su'fa), <sup>18</sup>toya'caen Andrés, Felipe, Bartolomé, Mateo, Tomás, Santiago (Tsaja Alfeo dutssi'ye), Tadeo, Simón (tsaja cananeandeccu'su a'i) <sup>19</sup>toya'caen Judas Iscariote (tsaja Jesúsma chi'gapa afe'su tsu).

**Chiga Qquendya'pama egae afase'cho**  
*(Mt 12.22-32; Lc 11.14-23; 12.10)*

Tsomba Jesúsja tsaoni ja tisema shondosundeccui'ccu. <sup>20</sup>Tsaoni ja'ni'qque ccase a'lja bo'fa. Nane panshaen bo'fasi aña'qque osha'fambi. <sup>21</sup>Tsa'caen tson'jen'ni Jesús antiandeccu osha'choma pañamba tisema angaye jílfa, sumbie da qquen supa.

<sup>22</sup>Toya'caen Chiga manda'choma atesiansundeccu Jerusaléne jipa su'fa:

—Va a'ingaja cocoya na'su Beelzebú tsu ca'ni. Tsa tisema in'jaensi tsu cocoyama joqquitssiañe osha.

<sup>23</sup>Tsonsi Jesúsjia poiyi'cco a'ima ttu'sepa condase'choi'ccu afa:

—¿Ma'caen tsu cocoya na'su Satana tisumajan joqquitssiaña?

<sup>24</sup>Majan ande'su nasundeccu tisupanaccui'ccu iyicco'ta tsangae tsu pasa'faya. <sup>25</sup>Toya'caen fae etti'sundeccu faenga'sui'ccu iyicco'ta fae'ngae can'jeñe osha'fambi. <sup>26</sup>Tsa'cansi Satanajan Satanama joqquitssian'choecan'da ñoa'me tsu tisuma chi'gaye'can. Tsa'caen tisuma chi'ga'ta ¿ma'caen tsu tiseja na'sia'caen mandaya? Nane tsa'caen tson'da tsangae tsu pasaya.

<sup>27</sup>Qui'ambe tsa'o'suma tsu ca'nañe osha'fambi na'suma otie tandan ccuiñambi'ta. Nane o'tie tisema tandaña'cho. Tandan'ninda tise'bema cca'nañe osha.

<sup>28</sup>Nane ñoa'me gi su: Osha'cho egae tsincon'cho, osha'cho Chiganga afase'cho'qque a'l'ye joqquitssiqque'su tsu. <sup>29</sup>Tsa'ma majan Chiga Qquendya'pama afase'ninda ñoa'me tsu tise egae tsincon'choja joqquitssi'masia. Ts'a'cansi tsangae tsu tsaja shacapa.

<sup>30</sup>Qquen tsu Jesúsja su a'i tisema cocoya ca'ni'cho qquen su'fasi.

**Jesús antiandeccu ji'fa**  
*(Mt 12.46-50; Lc 8.19-21)*

31 Tsa'caen tson'jen'ni Jesús chan, tise quinshingendeccu ji'fa. Tsa'ma tsain'bio a'isi ca'nimbe'yí tsotefani ccutsupa faesuma manda maña Jesúsma ttusengaye. 32 Tsonsi Jesúsi'ccu dyaisundeccu su'fa:

—Que mama, que quinshingendeccu tsu tsotefani ccutsupa queve ttuse'je'fa.

33 Tsa'caen su'fasi Jesúsja su:

—¿Majan tsu ña mama? ¿Majan tsu ña quinshingendeccu?

34 Tsomba tisei'ccu dyaisundeccuma piyicamba canjaemba su:

—Vandeccu, ñai'ccu can'jensundeccu tsu ña mama, ña quinshingendeccu. 35 Nane poiyi'cco majan Chiga in'jan'choma pañamba canse'ta tsa tsu ña quinshi, ña que'tte, ña mama.

**Gaiña jon'sune condase'cho**  
*(Mt 13.1-9; Lc 8.4-8)*

**4** 1 Tsomba ccase Jesús mar otafanga japa atesiañe ashaen. Tseni jasi tsain'bio a'i tisenga bo'fa. Panshaen bo'fasi Jesús marni duse'cho shavonga otsepa dyai. Jesús tsa'caen otsesi a'ija sa'aní ccutsu'fa. 2 Tsa'caen dyaipa a'inga condase'chongae osha'choma atesian'jen. Tsa'caen atesian'jemba qqun conda:

3 —Paña'faja vama. Fae a'i gaiña jon'su ja. 4 Gaiñasi enttingeja tsaiqui utufanga sheque. Tsa'caen shequesi chhiriria jipa an'fa. 5 Enttingeja fattocconga sheque. Tse'ttija ande tombutssimbí. Tsa'cansi utatsse sho'yo. 6 Tsa'ma setsa'fa mechopa coe'je desi pandipa samba. 7 Enttingeja anccosiccunga sheque. Tsonsi anccosi fae'ngatsse coensi ñotsse jon'cho nambe'yí pa. 8 Majanjan ñotssia andenga sheque. Tsaja sho'yopa coemba na'fa. Majan choja treintave na'fa. Majan sesentave na'fa. Majan cieme na'fa.

9 Tsomba Jesús tsendeccuma su:

—Majan tsosinapaja, ñotsse paña'faja.

**Jesús condase'cho condaye in'jan'cho**  
*(Mt 13.10-17; Lc 8.9-10)*

10 Tse'i a'i bo'fa'cho ja'fasi, Jesúsi'ccu jacansundeccu, tisema doce shondosundeccu tisei'ccu tisuyi can'jemba iñajampaña'fa:

—¿Jongoesu qqun tsu suye in'jan tsa condase'cho?

11 Tsonsi Jesúsja su:

—Tayoe ma'caen Chigama na'sian'cho aindeccuve dapa canse'faya'chove Chigaja a'inga condambi. Ja'ño tsu que'inga pañañe in'jan. Tsa'ma cca'indeccu toya pañañe osha'fambisi condase'choi'ccu gi tise'pama atesian'jen. 12 Nane tsendeccuja can'ma atte'fambi. Paña'ma in'jan'fambi. Tsa'cansi gi condase'choi'ccu tise'pama atesian'jen. Tsa'ma ñame in'jan'ma ccusha'faya'bi. Nane Chiga'qque tise'pa egae tsincon'choma joqquitssiaña'bi.

**Gaiña jon'sune ma'caen in'jan'cho**  
*(Mt 13.18-23; Lc 8.11-15)*

**13** Toya'caen Jesúsja su:

—¿Que'i'qque ti qui paña'fambi va condase'choma? Vama pañambi'ta ¿ma'caen qui faesu condase'choma paña'faya? **14** Choma gaiña'su tsu Chiga Aya'fama condase'su. **15** Majan a'ija tsaiqui utufanga gaiñasi sheque'choacan'fa tsu. Chiga Aya'fama paña'fasi cocoya na'su, Satana, jipa choma itsaqquia'caen tise'pa injama'cho'ye tsa Chiga Aya'fama paña'jen'choma aqquepoen.

**16** Majan a'ija fattocconga sheque'choacan'fa tsu. Chiga Aya'fama pañamba avujatsse in'jan'fa. **17** Tsa'ma setsa'fa shacaqquia'caen injama'cho ta'letssimbi. Re'riccone in'jamba, cca'indeccu Chiga Aya'fama pañasundeccuma noñangiansi me'detsse canse'ta injama'cho chapiansi tsu antte'fa. **18** Majanjan anccosiccunga sheque'choacan'fa tsu. Tsendeccuja Chiga Aya'fama paña'ma **19** pansenhaen va ande'su jincho'choma in'jamba asi'ttaen'fa. Ti'tsse ricove daye in'jamba osha'chove ti'tsse in'jan'fa. Tsa'caen in'jamba Chiga Aya'fama paña'choma fi'ttiqquia'caen tise'pa in'jan'choma nañámbi. **20** Tsa'ma majan a'ija ñotsia andenga jon'choa'caen Chiga Aya'fama pañamba injama'cho'ccu in'jan'fa. Ñotsse naqquia'caen cca'indeccunga condapa atapa'fa. Majan treintave atapa'fa. Majan sesentave, majan cieme atapa'fa.

**Tuñone condase'cho**  
*(Lc 8.16-18)*

**21** Toya'caen tsu su:

—¿A'ita ti tuñoma setsaemba cafon tsosiccunga ccutsiaña? Tsambi'ta ¿anambacco tsosiccunga ti ccutsiaña? Me'i. Tuñomajan sefaní ancaeña'cho cuintsu a'tatssiye. **22** Tsa'cansi tsangae a'tuya'choja jimbi. Tsa'ma osha'choja jai'ngae attiansi qui atte'faya. Ni tsangae condaya'b'il'choaja jimbi. Jai'ngae condasesi qui a'tatsse paña'faya. **23** Majan tsosinapaja ñotsse paña'faja.

**24** Toya'caen tsu su:

—Ñotsse in'jamba paña'faja. Que'i agattopa cca'indeccunga afeqquia'caen tsu Chigaja agattopa que'inga afeya. Toya'caen ti'tsse'qque tsu que'i pañasundeccunga afeya. **25** Nane majan an'bian'ninda ti'tsse tsu tisenga afeya. Tsa'ma majan mechomajan itsaya'cho. Nane tise re'riccoama'qque tsu tisema itsaya'cho.

**Cho sho'yo'chone condase'cho**

**26** Toya'caen Jesúsja su:

—A'i choma andenga jonsi sho'yoqquia'caen tsu a'ija Chiga aindeccuve da'faya. **27** Nane jon'suja, choma jomba anamba qquendyapa, cosepa a'ta'ni'lque tiseja atesumbi cho ma'caen da'je'choma. Jon'su atesumbi'te choja sho'yopa coen'jen. **28** Nane ande'ye tsu tisuyi sho'yopa coen. Tseyija

naje sombopa tse'ttieja canttini'cco sombo. Tse'i tsu na'chove da. <sup>29</sup>Na cu'chosí taiya'cho napisí a'ija japa tai'fa.

**Mostasa chone condase'cho**  
(Mt 13.31-32; Lc 13.18-19)

<sup>30</sup>Toya'caen Jesús su:

—¿Ma'can tsu a'i Chiga aindeccuve daya'cho? ¿Jongoesu condase'choi'ccu gi tsane condaseya? <sup>31</sup>Nane tsata tsu mostasa choma andenga jonqquia'can. Pa'cco va andeni jinchombe choma bove'cco tsu mostasa choja. <sup>32</sup>Tsa'ma jonsi sho'yopa poi teta'cho na'jima ti'tsse randeve da. Nane ttemba'qque randesi chhiriria chhajepa jipa tise tumbianccunga ño'fa'fa.

**Condase'chongaeyi atesian'jen'cho**  
(Mt 13.34-35)

<sup>33</sup>Ya'caen tsu Jesúsja osha'cho condase'choi'ccu Chiga Aya'fama atesian. Nane ma'caen a'i pañañe osha'fa'nijan tsa'caen tsu tise'panga atesian. <sup>34</sup>A'tatsse afambeyi condase'choi'ccuyi tsu atesian. Tsa'ma tisema shondosundeccui'ccu tisuyi can'jemba pa'tssima a'tatsse conda.

**Fingian, mar'qque Jesúsma paña'fa**  
(Mt 8.23-27; Lc 8.22-25)

<sup>35</sup>Tsequi a'ta cosesi Jesúsja tisema shondosundeccuma su:

—Jinge mar jonifani jaye.

<sup>36</sup>Qquen supa Jesúsja toya shavo duse'choni dyaisi bo'fa'choma catipa tisema anga'fa. Toya'caen cca'indeccu faesu shavongae fae'ngae ja'fa. <sup>37</sup>Tise'pa jayisi fingian quia'me jangi. Shave'pa'qque jangipa shavonga ca'nimba on'baye tson'jen. <sup>38</sup>Jesúsja shavo setsanga asusu'choemba ana'jen. Tsa'caen shave'pa jangisi tisema shondosundeccu Jesúsma qquendyaemba su'fa:

—Atesian'su, ¿injiengembi ti qui? ¡Cu'nomba gi paye tson'jen'fa!

<sup>39</sup>Tsonsi Jesús qquendyapa, fingiama iyu'upa, marma manda:

—¡Vuiquija! ¡Ppimppianccuve daja!

Qquen susi fingian pasasi mar'qque ppimppi'en da.

<sup>40</sup>Tsomba tisema shondosundeccunga su:

—¿Jongoesie qui panshaen dyo'fa? ¿Ñame in'jan'fambi ti qui?

<sup>41</sup>Tsa'ma tise'paja dyopa can'boen'fa. Tsomba tisupapora su'fa:

—¿Ma'can tsu va a'i? Mandasi fingian, mar'qque tisema paña'fa.

**Gadara ande'su a'i cocoya ca'ní'cho**  
(Mt 8.28-34; Lc 8.26-39)

**5** <sup>1</sup>Tsomba mar jonifani isepa ccattufa'fa Gadara andeni.

<sup>2-3</sup>Ccattufapa shavo'ye sombosí fae a'i cocoya ca'ní'cho Jesúsnga ji. Nane tsa tsandieja ayama atú'ttini can'jemba ji. Tiseni cocoya can'jensi

a'i ja tisema tandañe osha'fambi. Ni candenai'ccu tandañe osha'fambi.

<sup>4</sup>Nane tsain'bitsse candenai'ccu tisema tandandan'fa. Tive, tsu'ttema'lqque yoshavai'ccu tandandan'fa. Tsa'ma oppattu shequiamba ja. Tsa'cansi majañi'lqque tisema atesiañe osha'fambi. <sup>5</sup>Nane pa'cco a'la, pa'cco cose ccotta'cconi ayama atú'ttini'lqque jacamba fundo'je. Patunga'lqque amppipa iña'cca. <sup>6</sup>Tsa'ma Jesúsma bianima atepa buttopa japa ccarupa dyai Jesús tsutteccofanga. <sup>7-8</sup>Tsonsi Jesúsja su:

—Cocoya, ijooquitssija va a'i'ye!

Tsa'caen susi cocoyaja a'ima afaensi quia'me fundopa su:

—¡Joccapitssia Chigambe Dutssi'ye qui, Jesús! ¿Jongoesie qui ñangata ji? ¡Chigáne ñama noñangianjama!

<sup>9</sup>Qquen susi Jesúsja iñajampaña:

—¿Jongoesu inise qui?

Tiseja su:

—Legión (Injantssia Sundarondeccu), qquen gi inisecho'cho, ingija tsain'bitssipa.

<sup>10</sup>Tsa'caen supa tsain'bitsse Jesúsma iñajan cuintsu biani moembe cañe. <sup>11</sup>Tse'ttini tsain'bitssi cochi ccotta'cco piyiccu'fani an sheque'fa.

<sup>12</sup>Tsa'cansi cocoyandeccu Jesúsma iñajan'fa:

—Ingima mandaja cochinga, ingi tsendeccunga ca'niñe.

<sup>13</sup>Tsonsi Jesús tsa'caen manda anttesi cocoyandeccu tsa a'i'ye sombopa cochinga ca'ni'fa. Tse'ttija dos mil cochi can'jemba cocoyandeccu tise'panga ca'nisi buttopa amppippi ja'fa marnga. Marnga amppipa andeccopa pa'fa. <sup>14</sup>Tsonsi cochima coirasundeccu tsama atepa buttopa ja'fa condaye. Nane canqquenga japa conda'fa. Biacca can'jensundeccunga'lqque conda'fa. Tsa'caen conda'fasi a'i can'su ji'fa ma'caen tsu da'fa qquen in'jamba. <sup>15</sup>Jesúsnga jipa tsa tayoe cocoya ca'ni'cho a'ima atte'fa. Nane tsa tayoe Tsain'bitssi Cocoya Sundarondeccu qquen inisecho'cho tayo ñotsse in'jamba ondiccupa dyai. Tsama atepa dyo'fa. <sup>16</sup>Tsonsi tse'tti can'jensundeccu osha'choma atepa condase'fa. Nane cocoya ca'ni'choma ccushaen'chone, cochi ma'caen da'chone'lqque condase'fa. <sup>17</sup>Aindeccu tsa'caen pañamba Jesúsma iñajan'fa cuintsu tise'pa ande'ye sombopa jaye.

<sup>18</sup>Tsa'caen su'fasi Jesús shavonga otsesi tsa cocoya ca'ni'cho ccusha'cho Jesúsnga catsepa su:

—Ña'lqque quei'ccu jacañe.

<sup>19</sup>Qquen susi Jesús se'pipa su:

—Que tsaoni, que antiandecuni jaja. Japa condaseja ma'caen Na'su quema mende'yepa ñotssiave tson'choma.

<sup>20</sup>Tsonsi tsa a'i japa condaseye ashaen. Nane pa'cco Decápolis andenga condasé jacaen ma'caen Jesús tisema ñotsse tson'choma. Condasesi poiyi'cco a'i pañamba asi'it'aemba can'boen'fa.

**Jesúsja Jairo onque'ngema ccushaen  
Ondiccu'jema pporemba ccusha'cho  
(Mt 9.18-26; Lc 8.40-56)**

<sup>21</sup>Tsomba Jesús shavonga otsepa toefanga isesi tsain'bio a'i tisenga bo'fa. Tsa'caen bo'fasi Jesúsja mar otafanifi can'jen. <sup>22</sup>Tseni can'jen'ni fae'cco, Chiga manda'choma atesian'jen'tti'su na'su, Jesúsnga ji. Tise iniseja Jairo. Jipa Jesúsma attepa tise tsutteccofanga amppi ccui. Amppi cciupa tsain'bitsse iñajamba su:

<sup>23</sup>—Ña onque'nge tsu paye tson'jen. Jipa que tivei'ccu pporeajan cuintsu ccushapa canseye.

<sup>24</sup>Qquen susi Jesús tisei'ccu ja. Tsa'ma tsain'bio a'i'qque jayipa ta'yo'o. <sup>25</sup>Bo'fa'cho enttinge'ye fae'cco pushesu ji. Tise egápai'ccu dañongepa doce canque'fave me'detsse canse. <sup>26</sup>Nane poi sejesundeccunga jasi tisema ti'tsse vanaen'fa. Tsa'ma ccushambe'yí pa'cco tise corifin'dima afepoen cati. Nane ccushambe'yí bove da. <sup>27</sup>Tsomba Jesús ñotsse ccushaen'jen qquen pañamba tsa pushesu bo'fa'cho enttinge'ye sepaccofae catsepa Jesús ondiccu'jema pporean. <sup>28</sup>Nane qquen asi'ttaemba pporean: “Tise ondiccu'jeve'yí ppore'an'qque gi ccushaya.” <sup>29</sup>Qquen asi'ttaemba pporeensi tse'faei'ccuyi tise egápaja samba. Tsa'caen dasi tisu ai'vo ñotsse ccusha'choma atesu. <sup>30</sup>Tsa'ma Jesús'qque tisu ccushaen'choma atesupa piyicamba iñajampaña:

—¿Majan tsu ña ondiccu'jema pporean?

<sup>31</sup>Qquen susi tisema shondosundeccuja su'fa:

—Vui'o a'imbipa pporeensi qui “¿Majan tsu ñama pporean?” qquenjan su'ya.

<sup>32</sup>Tsa'ma Jesús poifama piyicamba majan pporean'chove atteye tta'tta.

<sup>33</sup>Tsa'caen ttattal'jesi pushesuja tisu ccusha'choma atesupa ttun'dundu'je'e dyo'ma Jesúsnga ji. Jipa Jesús tsutteccofanga ccarupa dyaiipa pa'ccoma tansintsse conda. <sup>34</sup>Condasi pañamba Jesúsja su:

—Shim'ppi, ñame in'jamba qui ccusha. Opatsse canseja. Ccatsse'qque tsa'caen vanaña'bi qui.

<sup>35</sup>Tsa'caen Jesús toya afa'je'ni atesian'jen'tti'su na'su tsaone ji'fa. Jipa Jaironga su'fa:

—Tayo tsu que onque'ngeja pa'ya. Tayo pa'nijan ¿jongoesie qui ti'tsseja na'suma noñagian?

<sup>36</sup>Tsa'ma Jesús tsa'caen su'je'fa'choma pañamba Jaironga su:

—Dyombe canjan. Aqqua in'janjan.

<sup>37</sup>Tsomba Jesús cca'indeccuma se'pipa –Pedro, Santiago, Juan (tsaja Santiago quinshin)– tsendecuveyi anga. <sup>38</sup>Tsendeccuma angapa atesian'jen'tti'su na'su tsaoni napipa atte poiyi'cco a'i qquejian'fa'choma, fundopa i'na sheque'fa'choma. <sup>39</sup>Tsa'onga ca'nimba Jesúsja su:

—¿Jongoesie qui qquejian'fa? ¿Jongoesie qui ina'jen'fa? Va du'shuja pambe'yí ana'jen.

<sup>40</sup>Tsa'caen susi tsendeccuja feña'fa. Feñasi Jesús poiyi'ccoma manda cuintsu sombo'faye. Tsomba du'shumbe yaya, du'shumbe mama, tisei'ccu ji'fa'chondeccui'ccuyi ca'nii'fa du'shu pa'cho ccuini. <sup>41</sup>Ca'nimba Jesúsja du'shumbe tive'ye indipa su:

—Tarita comi (Qquen tsu su: Du'shu, quema gi su, Jangija).

<sup>42</sup>Tsel'fiae'i'ccuyi du'shuja jangipa tsui ja'je. Tsa pushesu du'shuja doce canqque'fave an'bian'cho. Tsonsi poiyi'cco a'i dyo'oe can'boen'fa.

<sup>43</sup>Tsa'ma Jesús tise'pama iyu'upa su:

—Majangayi'qque conda'fajama.

Tsa'caen supa du'shuma o'fian'faye manda.

**Jesús Nasaretni jacañ**  
(Mt 13.53-58; Lc 4.16-30)

**6** <sup>1</sup>Jesús tse'ttie sombopa tise canqqueni ja. Tisema shondosundeccu'qque ja'fa. <sup>2</sup>Tseni can'jembä sema'ma'qquia a'ta napisi Jesús Chiga manda'choma atesian'jen'ttinga ca'nimba atesiañe ashaen. Tsain'bio a'i tise atesian'jen'choma pañamba can'boemba su'fa:

—¿Mani tsu va a'lja japa osha'choma atesupa ji? Tseni jasi ¿jongoesu atesian'jen'choma tsu tisenga atesian'fa? ¿Majan tsu tisema oshaen tise tive'i'ccu tsa'caen sefacconi'su agattoen'choma canjaeñe? <sup>3</sup>Tiseja vani'su mesama sema'su tsu, María dutssi'ye. Tise quinshingendeccu, Santiago, José, Judas, Simón, toya'caen tise que'ttendeccu'qque vani ingi'ccu can'jen'fa.

Tsa'caen supa Jesúsma iyicca'yepa paña'fambi. <sup>4</sup>Tsa'ma Jesús tise'panga su:

—Chiga Aya'fama afa'su ccani jasi tsenisundeccu tisema in'jamba paña'fa. Tsa'ma tisu canqquenisundeccu, tisu antiandeccu, tisu tsa'osundeccu'qque tisema paña'fambi.

<sup>5</sup>Tsa'can'fasi Jesúsja tise'panga minga'veyie'i'qque canjaen'choma canjaembi. Nane aquia enttingeve pajisundeccuma ppuraemba ccushaen.

<sup>6</sup>Tsendecca ja in'jan'cho shacasi Jesús asi'ttáen antte.

**Candusiañe manda'cho**  
(Mt 10.5-15; Lc 9.1-6)

Tsomba Jesús faesu chipiri canquengae jacamba atesian'jen. <sup>7</sup>Tisema doce shondosundeccuma ttu'sepa manda cuintsu dosve dosveyi jacañ'faye. Mandapa tise'panga antte cuintsu cocoyama joquitssian'faye. <sup>8</sup>Toya'caen manda osha'choma angambe'yi fae accuicco'chovey়i angaye. Nane pan, o'va, ni corifin'dive'qque meccoyi ja'faye. <sup>9</sup>Fae tisu ejian'cho sapatoi'ccuyi, fae ondiccu'jei'ccuyi jaya'cho –dosveja me'i. <sup>10</sup>Qquen mandapa su:

—Majan tsa'onga ca'nii'da tse'ttini can'jen'faja tisu jaya'cho napiya'ngae. <sup>11</sup>Majandecu que'ima chi'gapa que aya'fama paña'fambi'nijan tsa canqque'ye sombopa ja'faja. Jayipa que tsu'ttenga ancamba totopa'ma

fanttundu cati'faja tise'pa egae tson'choma canjaeñe. Ñoa'me gi que'imá su: Osefaeña'cho a'ta napijisi tsa canqquesundeccu tsu bove dyo'tsse da'faya. Nane tayopi'su Sodoma canqquesundeccu, Gomorra canqquesundeccu'qque ñoa'me egae tsincomba tsequi a'ta ñoa'me vana'faya. Tsa'ma que'imá chi'gasundeccuja tise'pama ti'tsse tsu vana'faya.

<sup>12</sup>Jesús tsa'caen mandasi tsa doce tisema shondosundeccu japa candusian'fa cuintsu a'i tise'pa egae tsincon'choma catiye in'jamba ño'amé da'faye. <sup>13</sup>Toya'caen tsain'bitssia cocoyama'qque joquitssian'fa. Tsain'bitssia pajisundeccuma'qque cambajuma yayapoemba ccusha'shaen'fa.

### Na'su Herodesja Feti'su Juanma fi'tti

*(Mt 14.1-12; Lc 9.7-9)*

<sup>14</sup>Poiyi'cco a'i Jesúsne ñotsse afa'fasi Na'su Herodes'qque paña. Nane majandeccu su'fa:

—Feti'su Juan pa'cho tsu ccase qquendya. Tsa'camba tsu osha'choma oshacho.

<sup>15</sup>Cca'indeccuja su'fa:

—Tayopi Chiga Aya'fama afa'su Elías tsu.

Toya'caen cca'indeccuja su'fa:

—Faesu Chiga Aya'fama afa'su tsu, tayopi Chiga Aya'fama afasundequia'can.

<sup>16</sup>Qquen su'fasi Herodes pañamba su:

—Va a'ija Juan. Ñajan tise tsovema chattuye mandasi chattupa fi'tti'fa. Tsa tsu ccase qquendya.

<sup>17-18</sup>Nane Herodesja tise quinshin Felipe pushema itsa tisumbeve. Tsa pushesu inise tsu Herodías. Tsa'caen tsonsi Juanjan Herodesma su:

—Ega tsu que antian pushema an'bíane.

Qquen susi tsa pushesu, Herodíasja, Juanma iyicca'yepa fi'ttiye in'jan. Tsa'caen in'jansi na'su Herodes Juanma indipa candenai'ccu tandamba picco'je'ttinga picco.

<sup>19</sup>Herodíasja tsa'caen Juanma iyicca'yepa fi'ttiye in'jan'ma Herodes se'pisi oshambi. <sup>20</sup>Nane na'su Herodesja Juan egae jinchombipa ño'asi atesupa fi'ttiye dyojo. Tsa'caen in'jamba tsu se'pi Herodías Juanma fi'ttiye. Tsa'camba na'su Herodes Juanma pañañe in'jan'ma tise injama'choni dyojoqqui'a'caen asi'ttaen. Tsa'ma toya tsu avujatss e tisema paña. <sup>21</sup>Tsonsi Herodías ronda'je'cho a'ta napi. Tsequi a'ta na'su Herodes canqque'fa napisi fiestaen'jen'fa. Nane fiestaembra poiyi'cco nasundeccu, sundaro capitández, Galilea'su joccapindeequiama'qque ofian'jen. <sup>22</sup>Tsa'caen ofian'jen'ni Herodías onque'nge ca'nimba boirasi Herodes, pa'lo tise'i'ccu dyaisundeccu avuja'fa. Na'su Herodes avujapa pushesunga su:

—Jongoesuve in'jamba iñajan'ninda gi afeya.

<sup>23</sup>Toya'caen tsu ñoa'me su'choi'ccu qquen su:

—Ñoa'me gi su, jongoesuve que iñajan'ninda afeya gi –nane pa'cco ña na'su manda'cho andema enttingeveja.

<sup>24</sup>Qquen susi pushesuja japa tise chama iñajampaña:

—¿Jongoesuve gi iñajaña?

Chanjan su:

—Iñajanjan Feti'su Juan tsovema.

<sup>25</sup>Qquen susi tse'fiae'i'ccuyi pushesuja na'su can'jeni japa su:

—In'jan gi ja'ñoñi Feti'su Juan tsovema chattupa patiyanga ppiñamba ñanga i'faye.

<sup>26</sup>Qquen iñajansi na'su Herodes ñoa'me ñoquimbi. Tsa'ma ñoa'me su'choi'ccu tayo susi tise'i'ccu dyaisundeccu'qque paña'fachosi afopoeñe in'jambi. <sup>27</sup>Tsa'camba tse'fiae'i'ccuyi sundaroma manda cuintsu Feti'su Juan tsovema chattupa iye.

<sup>28</sup>Tsonsi sundaroya picco'je'ttinga japa Juan tsovema chattu. Chattupa patiyanga ppiñamba ipa afe pushesunga. Pushesuja isupa tise changa afe.

<sup>29</sup>Tsa'caen fi'tti'fasi tisema shondosundeccu pañamba jipa tise ai'voma angapa a'tu'fa.

### Jesúsja cinco mil a'ima o'fian

(Mt 14.13-21; Lc 9.10-17; Jn 6.1-14)

<sup>30</sup>Jesúsja tisema shondosundeccuma candusiañe mandasi japa toequi ji'fa. Jipa Jesúsnga bopa conda'fa tise'pa ma'caen tson'choma, tise'pa ma'caen atesian'choma'qque. <sup>31</sup>Conda'fasi Jesúsja su:

—Jinge jaye a'i menia tseni japa tisuyi ño'faye.

Nane tsain'bio a'i ja'nga ja'ngä ji'je'fasi añe'qque osha'fambi. <sup>32</sup>Tsa'cansi Jesús tisema shondosundeccui'ccu tisupayi shavongae ja'fa a'i menia. <sup>33</sup>Tsa'ma ja'fasi tsain'bio a'i atepa asi'ltaembä in'jan'fa tise maningae ja'choma. Tsa'caen in'jamba poi canqqueni buttopa tisema o'tie napi'fa. <sup>34</sup>Tsonsi Jesúsja napipa shavo'ye sombopa a'i bo'fa'choma atepa tise'pama mende'ye. Nane oveja coira'suve mechondequia'caen injanga jacan'fa. Tise'pama mende'yepa osha'choma atesiañe ashaen. <sup>35</sup>Tayo sime da jisi tisema shondosundeccu jipa su'fa:

—Tayo tsu sime. Me'il'on tsu vani can'jeñe. <sup>36</sup>Aindeccuma manda mañajan cuintsu majan canqqueni, faesu tsa'o pporotssianga japa jongoesuma chavapa an'faye.

<sup>37</sup>Tsa'ma Jesúsja su:

—O'fian'faja que'i.

Tise'paja su'fa:

—¿Osha'faya ti gi ingija dosciento denario corifin'di'ccu chavapa tise'panga o'fiañe?

<sup>38</sup>Jesúsja su:

—¿Mañi'cco panme qui an'bian'fa? Can'ga'faja.

Can'gapa su'fa:

—Cinco pan, toy'a'caen dos avu san'jan.

<sup>39</sup>Tsonsi Jesús manda cuintsu poiy'cco a'i shoshovinga dyai'faye; enttingeve va'tti, enttingeve cca'tti cca'tti dyai'faye. <sup>40</sup>Fae'fanga cien, cca'fanga tsa'caen,

fae'fanga cincuenta cca'fanga tsa'caen dyai'faye. <sup>41</sup>A'i dyai'fasi Jesúsja cinco pan, dos avuma isupa Chiga sefacconima camba tsane Chigama ñotsse afa. Afa nanimba panma doñamba tisema shondosundeccunga afe cuintsu poiyi'cco a'inga attufaen'faye. Avuma'qque tsa'caen doñamba afesi attufaen'fa. <sup>42</sup>Poiyi'cco a'i amba tteppu'fa. <sup>43</sup>Tsa'caen tteppu'fasi doce saparove pan, avu antteye'choma on'boen'fa. <sup>44</sup>Nane panma an'fa'chondeccuja tsain'bitssia a'i. Tsandienaccuveyi agattosi cinco mil tsu an'fa.

### Jesús mar omba'ye tsui ja'cho

(Mt 14.22-27; Jn 6.16-21)

<sup>45</sup>Tsomba Jesúsja tisema shondosundeccuma manda cuintsu shavonga otsepa mar jonifani, Betsaidani isepa tise've ronda'je'faye. Tiseja shanda aindeccuma can moeñe. <sup>46</sup>Tsa'caen can moemba Jesúsja ccotta'cconga ansunde Chigama iñajañe.

<sup>47</sup>Tayo cosesi shavoja mar enttingeni duse. Toya'caen Jesúsja tisuyi sa'ani can'jemb a<sup>48</sup>tise'pa vana'jen'choma atte. Nane fingian indisi chho'chho'a'l'qque jaye osha'fambi. Tsa'caen vana'jen'fa'choma attepa Jesúsja a'taningae mar omba'ye tsui japa tise'panga catse. Nane tise'pama panshañe qquen in'jamba jayi. <sup>49-50</sup>Tsa'caen tsui na'leñe jayisi tisema attepa "Aya tsu" qquen in'jamba dyopa fundo'fa. Tsa'ma Jesúsja tse'faei'ccuyi afapa su:

—Quinse'tssi'faja. Ña gi. Dyombe can'faja.

<sup>51</sup>Tsa'caen supa Jesús shavonga otsesi fingian'qque vuiqui. Tisema shondosundeccuja dyopa can'boen'fa. <sup>52</sup>Nane panma agattoen'choma toya injiengembipa dyo'fa, tise'pa injama'cho shacasi.

### Genesaresundeccuma Jesús ccushaen

(Mt 14.34-36)

<sup>53</sup>Marma isepa Genesaret andeni cattufa'fa. Cattufapa shavoma tandan dusiamba shavo'ye sombo'fa. <sup>54</sup>Sombo'fasi tseni'su aindeccu "Jesús tsu" qquen in'jan'fa. <sup>55</sup>Tsomba buttopa japa conda'fa pa'cco tsa andenga. Conda'fasi pajisundeccuma fechochoeñe ashaen'fa. Nane tise'pa anal'jen'chonga ppiñamba andupa Jesús can'jeni i'fa. <sup>56</sup>Tsa'caen boña'fasi mani Jesús ja'n'i'qque tseni pajisundeccuja ccui'fa. Nane rande canqque, chipiri canqque, biacca can'jen'choni ja'n'i'qque pajisundeccu tisema iñajan'fa cuintsu tise ondiccu'je utufama pporeaeñe antteye. Nane poiyi'cco majan pporaen'choja ccusha'fa.

### ¿Injama'choma dañoña'qque'su?

(Mt 15.1-20)

**7** <sup>1</sup>Tsonsi majan fariseondeccu Jesúsnga catse'fa. Toya'caen majan Chiga manda'choma atesiansundeccu'qque Jerusaléne jipa tisenga catse'fa.  
<sup>2</sup>Tsa'caen jipa atte'fa majan Jesúsma shondosundeccu asettumbel'yi injanga

otishimbe an'fa. Tise'pa nafattian'choma injiengembe'yi an'fasi afase'fa. <sup>3</sup>Nane fariseondeccu, poiyil'cco israendeccu'qque tise'pa tayopi'su coenzandeccu nafattian'choma in'jan'fa. Tsa'camba tsain'bitsse otishimbi'ta an'fambi. <sup>4</sup>Toya'caen anque'su tiendane ji'a'qque otishimbi'ja an'fambi. Tsain'bitsse asettuye atesu'fa. Nane tasa, api, canderoma'qque tsa'caen giya'tsse cashi'fa. <sup>5</sup>Tsa'camba fariseondeccu, Chiga manda'choma atesiansundeccu Jesúsma iñajampaña'fa:

—¿Micomba tsu quema shondosundeccuja tayopi'su coenzandeccu nafattian'choma cati'fa? Nane asettu'choma injiengembe'yi tsu otishimbe an'fa.

<sup>6</sup>Jesúsja su:

—Tansintsse tsu tayopi'su Isaíasja que'i ño'amé attiamba afopoensundeccune condase. Nane qquen tsu tiseja Chiga su'choma tevaen:

Va a'ija aququia aya'fai'ccuyi Ñane ñotsse afa'fa.

Tsa'ma tisupa injama'chonijan Ñama chi'ga'fa.

<sup>7</sup>Aquia tsu Name in'janquia'caen tsincon'fa.

Nane tise'pa atesian'jen'cho aququia a'i in'jamba manda'choma tsu atesian'jen'fa.

<sup>8</sup>Que'ija Chiga manda'choma catipa a'i nafattian'choma nafattu'fa. Tsa'camba qui tasa, api, canderoma'qque tsain'bitsse cashiye atesu'fa. Nane osha'choma'qque qui tsa'caen atesu'fa.

<sup>9</sup>Toya'caen tsu Jesúsja su:

—Noa'me Chiga manda'choma qui cati'fa que'i coenzandeccu nafattian'choma nafattuye. <sup>10</sup>Tayopi'su Moisésta tsu su: "Paña'faja que yaya, que mamama." Toya'caen "Majan tise yaya, tise mamama egae afa'ta tsu paya'cho." <sup>11</sup>Tsa'ma que'ita qui antte'fa cuintsu dutssi'ye tise yaya, tise mamama suye: "Oshambi gi quema fuiteye. Pa'cco ña quema fuiteya'cho tsu 'Corban.'" (Nane 'Corban' tsu 'Chiganga afe'cho' qquen su'cho.) <sup>12</sup>Tsa'caen su'ta qui que yaya, que mamama fuitembe cañe atesu'fa. <sup>13</sup>Nane tsa'camba qui Chiga Aya'fa su'choma pañambiqquia'caen antte'fa que'i a'i nafattian'choma pañañe. Tsa'caeñi qui osha'choma'qque tsincon'fa.

<sup>14</sup>Qquen supa Jesús ccase aindeccuma ttu'sepa su:

—Poiyi'cco pañamba in'jan'faja. <sup>15</sup>Me'i tsu a'i aña'choma ansi injama'choma dañoñe. Tsa'ma egae in'jamba afasi egae afa'je'cho tsu tise injama'choma dañoña. <sup>16</sup>Majan tsosinapaja paña'faja.

<sup>17</sup>Jesúsja afa nanimba a'i'ye joquitssipa tsa'ongá ca'ni. Ca'nisi tisema shondosundeccu tsa condase'chone tisema iñajampaña'fa. <sup>18</sup>Iñajampañasi Jesúsja su:

—¿Que'l'qque ti qui paña'fambi? Atesu'fambi ti qui osha'cho an'choja a'i injama'choma dañoña'bi. <sup>19</sup>Nane an'choja injama'chonga ca'nimbi. Tsa'ma ttopanga japa ccopai'ccu catiyeya'cho.

Jesúsja tsa'caen supa, osha'cho anque'suja aña ñotssi qquen tsu su.

<sup>20</sup>Toya'caen tsu su:

—A'i egae in'jamba afasi egae afa'je'cho tsu tise injama'choma dañoña.  
 21 Nane injama'cho tsosine egae in'jaensi a'lja egae in'jan'fa. Tsa'caen  
 in'jamba tsu casara'chondeccu faesui'ccu egae can'se'fa. Injanga tsandie  
 pushesu anttembi'chondeeqquia fae'ngae egae can'se'fa. Cca'nal'fa. Fi'tticco'fa.  
 22 Faesumbema an'biañe in'jan'fa. Egae canse'fa. Afopo'en'fa faesuma egae  
 tsoñe. A'tatsse egae tsincon'fa. Tisu injama'choni faesuma se'pi'fa. Afase'fa.  
 Quinsepoen'fa. Nane sumbie daquia'caen injanga tsincon'fa. 23 Pa'cco tsa'caen  
 tson'cho tsu injama'cho tsosine sombo'cho. Sombopa tsu a'ima dañoña.

### **Faesu ande'su pushesu Jesúsve in'jan**

(Mt 15.21-28)

24 Tse'ttie sombopa Jesúsja Tiro, Sidón canqque jini'su andeni ja. Napipa  
 tsa'onga ca'nimba a'tutsse can'jeñe in'jan. Tsa'ma tayo a'l paña'fa tise  
 can'jen'choma. 25 Tse'fai'ccuyi fae pushesu tisema pañamba jipa Jesús  
 tsutteccofanga ccaru dyai. Tsambe onque'ngeja cocoya ca'ni'cho. 26 Tsa  
 pushesuja griego a'l Sirofenisia andenga isu'cho. Tsa jipa Jesúsma iñajan  
 cuintsu tise onque'nge'ye cocoyama joquitssiañe. 27 Tsa'ma Jesúsja tisema su:

—Antteja cuintsu o'tie dushundeccu an tteppu'faye. Ñotssimbi tsu  
 du'shu an'jen'choma itsapa ainga o'fiañe.

28 Tsa'ma tsa pushesuja su:

—Ju, na'su, ñotsse qui su. Tsa'ma ainshavaja an'jen'cho mesa tsosiccuni  
 ccuipa dushundeccu an'jensi sheque'je'choma an'jen'fa.

29 Qquen susi Jesúsja su:

—Notssse qui su. Jaye qui osha. Tayo tsu cocoyaja que onque'nge'ye  
 joquitssi.

30 Tsa'caen susi tsaoni japa tise onque'ngema atte tayo cocoya  
 joquitssisi ana'jen'choni ccui'choma.

### **Jesúsja ccushaen tsosinambima**

31 Tsomba Jesúsja Tiro ande'ye sombopa Sidón canquengae panshamba  
 Decápolis andengae panshamba Galilea marnga napi. 32 Tseni napisi  
 fae tsandie ayafambipa tsosinambima Jesúsnga i'fa. Ipa Jesúsma  
 iñajan'fa cuintsu tise tivei'ccu pporaemba ccushaeñe. 33 Tsonsi Jesúsja  
 tsosinambima a'l sheque'cho ccafanga anga. Angapa tisu tsimian'ccoi'ccu  
 tsambe tsosinama tsomi. Tsomba attuipa menzanza'fama'qque pporen.  
 34 Tsomba sefacconima camba qquendyaccopa su:

—Efata! (Fettayeja, qquen tsu su.)

35 Tse'fai'ccuyi tsosina fettayesi paña. Menzanza'fa'qque ccushasi tsu  
 ñotsse afa. 36 Tsomba Jesús poiyl'ccoma mandapa su:

—Majangayi'qque conda'fajama.

Tsa'ma ti'tsse'tsse se'pi'choma tise'paja ti'tsse condase'fa. 37 Nane ñotsse  
 can'boemba su'fa:

—Osha'choma tsu ñotsse tson. Tsongsinambima'qque pañaen.  
Ayafambima'qque afaen.

**Jesús cuatro mil a'ima o'fian**  
(Mt 15.32-39)

**8** <sup>1</sup>Tsequi a'ta tsain'bitssi a'i ccase bo'fa. Bo'tsse can'jen'fasi aña'chove me'i'onsi Jesúsja tisema shondosundeccuma ttu'sepa su:  
<sup>2</sup>—Mende'ye gi va aindeccuma tres a'ta ñai'ccu can'jemba ja'ño aña'chove an'bian'fambi tisupa añe. <sup>3</sup>Tise'pa tsaoni manda'nijan qquipoe'su'ta jongoesu quin'sui'ccu tsu tsaiqui'ye jaye osha'faya. Nane majandecuja biane ji'fa'choja.

<sup>4</sup>Tisema shondosundeccuja su'fa:

—Tsa'ma ¿ma'caen tsu o'fiaña'cho vanijan a'i meniamajan?

<sup>5</sup>Qquen su'fasi Jesúsja iñajampaña:

—¿Mañi'cco panme qui an'bian'fa?

Tise'paja su'fa:

—Sieteve.

<sup>6</sup>Tsonsi Jesúsja manda cuintsu poiyi'cco a'li andenga dyai'faye.

Dyai'fasi panma isupa tsane Chigama ñotsse afa. Afa nanimba panma doñamba tisema shondosundeccunga afe cuintsu cca'inga attufaen'faye.

<sup>7</sup>Toya'caen avuma'qque an'bian'fa. Tsama'qque isupa Chigama ñotsse afapa manda cuintsu tsama'qque attufaen'faye. <sup>8</sup>Tsonsi poiyi'cco a'li an tteppu'fa. An nani'fasi antteye'choma taipa siete saparove on'boen'fa. <sup>9</sup>An'fa'chondeccuja cuatro mil a'ia'ca'on tsu. Tsomba Jesús a'ima manda cuintsu tise'pa tsaoni ja'faye. <sup>10</sup>Manda mañamba tisema shondosundeccui'ccu shavonga otsepa Dalmanuta andeni ja'fa.

**Sefacconi'su canjaen'chove iñajan'fa**  
(Mt 16.1-4; Lc 12.54-56)

<sup>11</sup>Tseni napisi fariseondeccu jipa Jesúsi'ccu condaseye ashaen'fa qqueñañe in'jamba. Tsa'caen in'jamba iñajan'fa cuintsu sefacconi'su canjaen'choma canjaeñe. <sup>12</sup>Jesús injama'chone ñombi'yepa qquendyaccopa su:

—¿Jongoesie tsu va aindeccuja sefacconi'su canjaen'chove iñajan'fa? Ñoa'me gi su, mingavieyi'qque tise'panga canjaen'chove canjaeña'bi gi.

<sup>13</sup>Tsa'caen supa joquitssipa shavonga otsepa mar jonifani ja.

**Fariseondeccu atesian'cho**  
(Mt 16.5-12)

<sup>14</sup>Tsa'caen japa anqque'suma aqque'pa meccoyi ja'fa. Jo'su fae pancho'ccoyi an'bian'fa shavoni. <sup>15</sup>Tsonsi Jesúsja tise'pama mandapa su:  
 —¡Can'faja! Injama'tse in'jan'fajama fariseondeccu cupana'ccoma, ni Herodes cupana'ccoma'qque.

<sup>16</sup>Qquen susi tisema shondosundeccu ja tisupapora afaccye ashaen'fa:  
—Ingi panma imbisi tsu ya'caenjan su'ya.

<sup>17</sup>Qquen afacco'je'fasi Jesús in'jamba su:  
—¿Jongoesie qui panma i'fambi'choane afacco'fa? ¿Toya ti qui paña'fambi?

¿Toya ti qui in'jan'fambi? ¿Toya ti qui injama'cho shacapa in'jan'fambi?

<sup>18</sup>¿Atte'fambi ti qui tisupa tso'fei'ccu? ¿Ni paña'fambi ti qui tisupa  
tsongsinai'ccu? ¿Injan'jen'fambi ti qui? <sup>19</sup>Nane cincoyi'cho'cco panma cinco mil  
a'inga attufaen'choma, ¿mañi'cco saparove qui an antteye'choma on'boen'fa?

Tsonsi su'fa:

—Doceve.

<sup>20</sup>Toya'caen ¿sieteyi'cho'cco panma cuatro mil a'inga attufaen'choma,  
mañi'cco saparove qui on'boen'fa?

Tsonsi su'fa:

—Sieteve.

<sup>21</sup>Tsonsi Jesúsja su:

—¿Toya ti qui paña'fambi fariseondeccu atesian'jen'chone gi afa?

### Jesús Betsaida'su binima ccushaen

<sup>22</sup>Tsomba napi'fa Betsaida canqqueni. Napi'fasi Jesúsnga i'fa fae  
binima. Ipa iñajan'fa cuintsu pporeaeñe. <sup>23</sup>Tsonsi Jesús binima tive'ye  
indipa canqque joccani anga. Angapa bini tso'fema achaccui'ccu  
tssipoemba tivei'ccu tisema pporeen. Pporaemba iñajampaña:

—¿Osha ti qui atteye?

<sup>24</sup>Binijan camba su:

—Atte gi aindeccuma quini'jian'caen. Tsa'ma tsui'je'fa.

<sup>25</sup>Tsonsi Jesús ccase tise tivei'ccu tso'fema pporeen. Pporaensi ñotsse  
can'boeñe ashaemba ccusha. Nane bianima osha'choma ñotsse atteye osha.

<sup>26</sup>Tsa'caen ccushaemba Jesúsja manda cuintsu tisu tsaoni jaye. Mandapa su:

—Canqquenga jajama. Majangayi'qque condajama tseni.

**Pedro su: “Jesúsja Cristo tsu”**

(Mt 16.13-20; Lc 9.18-21)

<sup>27</sup>Tsomba Jesús, tisema shondosundeccu'qque Cesarea Filipo  
canqque jincho andeni jayi'fa. Toya tsaiqui'ye jayipa Jesúsja tisema  
shondosundeccuma iñajampaña:

—¿Majan qquen tsu cca'ija su'fa ñamajan?

<sup>28</sup>Qquen susi tise'paja su'fa:

—Majandecuta tsu su'fa, Feti'su Juan. Cca'ija su'fa, tayopi'su Elías.  
Toya'caen cca'ija Chiga Aya'fama afa'su qquen tsu su'fa.

<sup>29</sup>Tsonsi Jesúsja iñajampaña:

—¿Que'i'ja majan qquen qui ñama su'fa?

Tsonsi Pedroja su:

—Queja Chiga in'jan'cho Cristo.

<sup>30</sup>Tsa'ma Pedro tsa'caen susi Jesúsja mandapa su:

—Majangayi'qque tsama condafajama.

### Jesús tise paya'chone condase

(Mt 16.21-28; Lc 9.22-27)

<sup>31</sup>Tsomba Jesúsja atesiañe ashaemba su:

—Sefaccone Ji'cho A'l gi me'detsse vanaña. Nane coenzandeccu, Chigama afasu nasundeccu, Chiga manda'choma atesiansundeccu'qque ñama chil'gapa fi'tti'faya. Tsa'ma ñama fi'tti'fa'n'i'qque tres a'tangae gi ccase qquendyaya.

<sup>32</sup>Tsamajan Jesús a'tatsse conda. Tsonsi Pedro Jesúsma cca'ttinga angapa iyu'uye ashaemba su:

—Ya'caen afajama.

<sup>33</sup>Tsa'ma Jesús poiyi'cco tisema shondosundeccuma piyicamba Pedroma ccane'qque iyu'u:

—¡Joqquitssija ña'ñe Satana! Nane Chiga in'janquia'caen qui in'jambi. A'l in'janquia'caen qui in'jan.

<sup>34</sup>Ya'caen supa Jesús tisema shondosundeccuma, aindeccuma'qque ttu'sepa su:

—Majan a'l ñai'ccu fae'ngae jiye in'jan'chota tsu tisu in'jan'choma aqque'paya'cho. Tisu avuja'ccoma opiqquia'caen tsu tiseja ñai'ccu fae'ngae jacamba paya'ngae vanaña'cho. <sup>35</sup>Majan tisuma ccushaeñe in'jamba pa'ta catiyeya'cho. Tsa'ma majan ñame in'jamba ña ñotsse condase'choma in'jamba pa'ta tsata tsu ñoa'me ccushaya. <sup>36</sup>A'lja poiyi'ccoma patsupa osha'choma an'biamba toya'caen tisu canse'choma qqueña'da, ¿jongoesune tsu bareya? <sup>37</sup>Nane ¿mi'getsse tsu afepoeña'cho a'lja tise canse'choma chavaye? <sup>38</sup>Majan a'lja ñama, ña aya'fama'qque chi'gapa ansangepa va ñame in'jambipa egae tsinconsundeccunga ñane tansintsse condaye dyojol'fa. Tsa'caen ñama ansange'fa'nijan ñajan, Sefaccone Ji'cho A'l, jipa ccane'qque tsendeccuma ansangeya. Nane Chiga ña Quitsa ñama ñotssiave tsonsi, Tisema sefacconi'su ño'a shondosundeccui'ccu jipa gi tsendeccuma ansangeya.

**9** <sup>1</sup>Toya'caen tsu Jesúsja su:

—Ñoa'me gi su, majan que'i'su toya pambi'ta Chiga Quitsa que'i na'suve dapa manda'choma qui atesu'faya. Nane tsequi a'ta osha'choma tsu mandaya.

### Jesúsja ccaningae tsu da

(Mt 17.1-13; Lc 9.28-36)

<sup>2</sup>Tsomba seis a'ta pasasi Jesúsja ccotta'cco sefatssia'nga ansundepa Pedro, Santiago, Juanma'qque anga tisupayi can'jeñe. Tseni can'jemba tsendeccu caña'jen'ni Jesúsja ccaningae da. <sup>3</sup>Tise ondiccu'je chhariccotsse chandisu'ccoa'caen tototssie da. Nane majañi'qque va ande'su mappan'su tsal'cantsse totoeñe oshambi. <sup>4</sup>Toya'caen tayopi'su Elías, tayopi'su Moisés attiambia Jesúsi'ccu condasel'je'fa. <sup>5</sup>Tsama attepa Pedroja Jesúsma su:

—Atesian'su, ñotsse gi vani can'jen'fa. Tsao'ñña'faya gi tres tsa'ocho'ccoe-fae'cco quembe, faesuja Moisésmbe, faesuja Elásmbre.

<sup>6</sup>Nane shondosundeccuja poiy'cco ñoa'lme dyo'fa. Tsa'camba Pedroja jongoesu qquen suye in'jaembiosi injanga afa. <sup>7</sup>Qquen su'je'ni unjimba'cco tise'pama picco. Piccosi tsa unjimba'cco'ye aya'fa afa'choma paña'fa qquen su'choma:

—Va tsu ña in'jan'cho Dutssi'ye. Tisema paña'faja.

<sup>8</sup>Unjimba'cco pasasi tse'fae'i'ccuyi camba faesu a'ive atte'fambi. Jo'su Jesúsveyi atte'fa.

<sup>9</sup>Tsa'caen tsomba ccotta'cco'ye ande jipa Jesús tisema shondosundeccum a manda cuintsu tise'pa atte'choma condambe can'faye. Ja'i Sefaccone Ji'cho A'i papa ccase qquendyasi condaseye ñotssi. <sup>10</sup>Tsa'caen mandasi condambeyi can'fa. Tsa'ma tisupayi iñajampañacco'fa Jesús su'chone "papa ccase qquendyaya" qquen susi. <sup>11</sup>Tsa'caen asi'ttaemba Jesúsma iñajampaña'fa:

—¿Mingasi tsu Chiga manda'choma atesiansundeccuja "Elías tsu Cristoma o'tie jiya" qquenjan su'fa?

<sup>12-13</sup>Qquen iñajampaña'fasi Jesúsja su:

—Noa'me tsu Elíasja o'tie jiya'cho pa'ccoma ñoñañe. Tsa'ma ñanda gi su tayo tsu Elíasja ji. Jisi a'lja tisema osha'choe ma'caen in'jangae tson'fa. Nane Chiga Tevaen'jen tisene suquia'caen tsu tisenga tson'fa. Toya'caen ¿jongoesu qquen tsu Chiga Tevaen'jenjan su Sefaccone Ji'cho A'ine? Nane tiseja chigayepa vanaña'cho, qquen tsu tevaen.

### Shancopajasheve da'cho du'shu

(Mt 17.14-21; Lc 9.37-43)

<sup>14</sup>Tsa'caen supa ccotta'cco'ye ande tisema shondosundecunci ji'fa. Jipa tsendeccunga a'l bojin sheque'choma atte'fa. Nane Chiga manda'choma atesiansundeccu can'jemba tsendeccui'ccu condase'je'fa. <sup>15</sup>Tsomba tse'i Jesúsma atepa can'boen'fa. Can'boemba butto'fa tisema chigambiañe. <sup>16</sup>Chigambian nanimba Jesúsja tisema shondosundeccum iñajampaña:

—¿Jongoesu qquen qui condase'fa jondeccui'ccu?

<sup>17</sup>Tsonsi fa'e tse'tti canjen'suja su:

—Atesian'su, vani gi i ña du'shuma, cocoya ca'nisi ayafambie da'choma. <sup>18</sup>Nane tise mani jaca'ni'qque cocoya indisi andenga amppi. Amppipa tse'ttinga aya'fae'qque ttottomboemba tte'ttoma tsai indipa a'ilvo ishopa pa'je. Tayo gi iñajan quema shondosundeccu cuintsu cocoyama joquitssiañe. Tsa'ma osha'fambi.

<sup>19</sup>Jesús pañamba su:

—¡Ay, que'ija injienge'fambi! ¿Min'ge'e gi que'i'ccuta can'jeña? ¿Min'ge'e gi tsuin'da angacaña? ¡l'faja du'shuma!

<sup>20</sup>Tsonsi i'fa. I'fasi cocoya Jesúsma atepa du'shuma indi pan'jaen. Tsa'caen pan'jaensi du'shu andenga amppipa mutsinomba aya'fae ttottomboemba pa. <sup>21</sup>Pasi Jesúsja tsambe yayama iñajampaña:

—¿Minguite tsu jova'caen dapa canse?

Du'shumbe yayaja su:

—Chuitepie tsu jova'caen dapa canse. <sup>22</sup>Nane tsain'bitsse cocoya ña du'shuma si'ngenga, na'enga amppiamba fi'tti qquen tsincon. Tsa'cansi que osha'ta ingima mende'yepa fuiteja.

<sup>23</sup>Jesúsja su:

—¿Jongoesie qui su “oshal’ta”? Nane pa'cco tsu oshayeya tise in'jan'nijan.

<sup>24</sup>Tsonsi du'shumbe yayaja fundondo'e afa:

—In'jan gi ñajan. ¡Ñama fuiteja ña ti'tsse in'jañe!

<sup>25</sup>Tsa'caen su'je'ni ti'tsse'o a'i bojisi Jesús attepa cocoyama iyu'upa su:

—Cocoya, ayafambie, tsonsinambie tsonque'su, ña gi manda joqquitssija va du'shu'ye. Ccatsse tisenga ca'nijama.

<sup>26</sup>Tsa'caen susi cocoyaja fundopa du'shuma ccase pan'jaemba somboin ja. Tsa'caen jasi du'shuja paqquia'caen ccui. Tsonsi cca'ija su'fa:

—¡Tayo tsu pa'ya!

<sup>27</sup>Tsa'ma Jesús du'shu tive'ye indipa qquitssa jangian. Jangiansi du'shuja jangi ccutsu.

<sup>28</sup>Tsa'caen tsomba Jesús tsa'onga ca'nisi tisema shondosundeccu tisupayi tisei'ccu can'jemba iñajampaña'fa:

—¿Ma'camba gi ingija cocoyama joqquitssiañe osha'fambi?

<sup>29</sup>Qquen su'fasi Jesúsja su:

—Tsesu cocoyamajan ambe'yi Chigama iñajamba tsu joqquitssianque'su. Tsa'caen tsombija joqquitssiañe oshaya'bi.

### **Jesús tisu paya'chone ccase conda**

(Mt 17.22-23; Lc 9.43-45)

<sup>30-31</sup>Tsa'caen tsomba tse'ttie sombopa Galileangae panson'fa. Jesúsja tisema shondosundeccuma atesian'jemba in'jambi majani'qque paña'faye tise ja'chove. Tsa'caen atesian'jemba tise paya'chone qquen condase:

—Sefaccone Ji'cho A'lima indipa tsu afe'faya aindeccunga cuintsu fi'tti'faye. Tsa'ma fi'tti'fasi papa tres a'tangae gi ccase qquendyaya.

<sup>32</sup>Tsa'ma tise'paja jongoesu qquen su'chove atesu'fambi. Tsa'camba Jesúsma ti'tsse iñajampañañe dyojo'fa.

### **¿Majan tsu ti'tsse'tssia?**

(Mt 18.1-5; Lc 9.46-48)

<sup>33</sup>Tsa'caen sú japa Capernaum canquenga napi'fa. Napipa tsa'onga ca'nimba Jesúsja iñajampaña:

—¿Jongoesu qquen qui que'ija tsaiqingae condase ji'fa?

<sup>34</sup>Tsa'ma tise'paja afa'fambi, tsaiqingae qquen condasepa: “¿Majan te ingi doce'su ti'tsse joccapatssia?”

<sup>35</sup>Tsa'caen afa'fambisi Jesúsja dyaiipa tsa docema ttu'sepa su:

—Majan que'i'su ti'tsse joccapatssia've daye in'jan'da tsu cca'ima bove om̄ba'suya. Tsaja cca'ima coira'suya.

<sup>36</sup>Tsa'caen supa Jesúsja du'shuma ttu'sepa tise'pa enttingenga ccutsian. Tsomba du'shuma munsin dyaipa su:

<sup>37</sup>—Majan a'i ña iniseningae afayepa du'shu qquen'cho'ccoa'ma ñotsse in'jan'da ñama'qque tsu ñotsse in'jan. Toya'caen majan ñama ñotsse in'jan'da jo'su ñameñi in'jambi. Tsa'ma ñama moen'suma'qque tsu in'jan.

### Majan chi'gambi'ta fuite'su tsu

<sup>38</sup>Tsonsi Juanjan su:

—Atesian'su, atte'fa gi fae a'i que inisema afapa cocoyama joqquitssian'jen'choma. Tsa'ma ingi'ccu jacambisi gi tisema se'pi'fa.

<sup>39</sup>Qquen susi Jesúsja su:

—Se'pimbe can'faja. Majan ña inisema afapa ñotsse canjaen'da tsaja ja'i ñama egae afaye oshaya'bi. <sup>40</sup>Nane majan ingima chi'gambi'ta ingima fuite'su tsu. <sup>41</sup>Majan a'i ñame in'jamba que'inga ñotsse afe'ninda Chigaja tsanga ñotsse afeya. Nane que'ija Cristombe a'i qquen in'jamba aquia tsa'ccuma cui'ñña'a'lqque ñotsse tsu isuya.

### Egae tsincon'chone condase'cho

(Mt 18.6-9; Lc 17.1-2)

<sup>42</sup>Majan va ñame in'jan'cho du'shuma egae tsoñe in'jaen'ninda bove ñotssi tsu tisema toya tsa'caen in'jaembite rande sunda'cho patuma tise tsifonga tandamba mar singu'ccunga andeccoemoeñe. <sup>43</sup>Tisu tiveyi quema egae tsincoñe in'jaen'ninda bove ñotssi tsu chattuye. Nane bove ñotssi tsu faefa'su tivei'ccuyi Chiga sefacconga ca'nimba canseye poifa'su tivei'ccu cococcuni si'nge anchanda'je'chonga catiyesa'ne.

<sup>44</sup>Tsenijan minsin'qque pa'masia, si'nge'qque paya'bi. <sup>45</sup>Toya'caen que tsu'tte quema egae tsincoñe in'jaen'ninda bove ñotssi tsu chattuye. Nane bove ñotssi tsu faefa'su tsu'ttei'ccuyi Chiga sefacconga ca'nimba canseye poifa'su tsu'ttei'ccu cococcuni si'nge anchanda'je'chonga catiyesa'ne.

<sup>46</sup>Tsenijan minsin'qque pa'masia, si'nge'qque paya'bi. <sup>47</sup>Nane que tso'fe'qque quema egae tsincoñe in'jaen'ninda bove ñotssi tsu tsefama tssan'jañe. Nane bove ñotssi tsu faefa'su tso'fei'ccuyi Chiga sefacconga ca'nimba canseye poifa'su tso'fei'ccu cococcuni si'nge anchanda'je'chonga catiyesa'ne.

<sup>48</sup>Tsenijan minsin'qque pa'masia, si'nge'qque paya'bi. <sup>49</sup>Nane tsenijan poiyi'cco tsu si'ngenga ansiange'faya.

<sup>50</sup>Patu ansin tsu ñotssi. Tsa'ma patu ansil'ñe ansin tssutssu catiye'ninda ñma'caen tsu ccase ansinpave daya? Que'ija ansinpapa ñotsse canse'faja. Tisupaporai'ccu opatsse ñotsse canse'faja.

**Pushema cati'chone Jesús atesian**  
*(Mt 19.1-12; Lc 16.18)*

**10**

<sup>1</sup>Tsa'caen supa Jesúsja Capernaumne sombopa Judea andeni Jordán na'en jonifani ja. Tseni jasi tsain'bio a'i tise can'jeni bo'fa. Tsa'caen bosi Jesúsja atesian tise in'janquia'caen. <sup>2</sup>Tsa'caen tson'jen'ni majan fariseondeccu Jesúsnga catse'fa. Tisema qqueñañe in'jamba qquen iñajampaña'fa:

—¿Notssi ti tsa'ndu tise pushema catiye?

<sup>3</sup>Qquen su'fasi Jesúsja su:

—¿Jongoe qquen tsu manda Moisésja?

<sup>4</sup>Tise'paja su'fa:

—Moisés tsu manda pushema catiye in'jan'da catiya'cho tevaen'jema tevaemba pushenga afepa catiye.

<sup>5</sup>Tsonsi Jesúsja su:

—Moisés tsu tsa'caen manda antte que'i injama'cho shacapa in'jan'fambisi.

<sup>6</sup>Tsa'ma tseyi me'ttia'ye agattoemba Chigaja tsa'caen anttembi. Nane tsandie, pushesuve tsu agattoen. <sup>7</sup>Tsa'cansi tsu tsandieja tise yaya, tise mamama catipa tise pushei'ccu canseya'cho. <sup>8</sup>Tsa'caen cansepa tsu dos a'i fae a'iveyi da'fa. Nane dos a'imbi tsu. Jo'su fae'ccoyi. <sup>9</sup>Chiga tsa'caen in'jamba fa'enga tsonsi a'iija tsa'caen fae'ccoe da'choma attufaembe can'faya'cho.

<sup>10</sup>Tsomba Jesús tsaoni can'jensi tisema shondosundeccu ja tsane ccase iñajampaña'fa. <sup>11</sup>Iñajampaña'fasi Jesús su:

—Majan tise pushema catipa faesuma pushe'ta tise aishe pushema tsu egae tsoña. <sup>12</sup>Toya'caen pushesu tise tsa'nduma catipa faesuma tsa'ndu'ta tise'qque tsu egae tsincon.

**Jesúsja dushundecuma me'de**  
*(Mt 19.13-15; Lc 18.15-17)*

<sup>13</sup>Tsonsi Jesúsnga dushundecuma i'fa cuintsu Jesús pporaeñe. Tsa'ma tsa'caen iña'fasi Jesúsma shondosundeccu iyu'u'fa. <sup>14</sup>Iyu'je'fasi Jesús attepa iyicca'yepa su:

—Antte'faja cuintsu dushundecu ñanga ji'faye. Nane tise'pama se'pimbe can'faja. Majan Chigambe a'iija va dushundeqquia'can tsu.

<sup>15</sup>Nane ñoa'me gi su, majan ñame in'jambipa va dushundeqquia'cambija osha'faya'bi tsu Chiga sefacconi ca'niñe.

<sup>16</sup>Tsa'caen supa Jesúsja du'shuma munsin dyaipa pporaemba tise'pane Chigama ñotsse afa.

**Chu'a tsandie rico Jesúsi'ccu afa**  
*(Mt 19.16-30; Lc 18.18-30)*

<sup>17</sup>Tsa'caen afa nanimba Jesús jaye tson'jen'ni fae tsandie buttopa jipa Jesús tsovejufanga ccaru dyaipa iñajampaña:

—Ño'an atesian'su, ¿ma'caen gi tsoña tsangae canseyeja?

<sup>18</sup>Jesúsja su:

—¿Jongoesie qui ñama “ño'an” qquenda su? Chigayi tsu ño'an, Faesu ño'ame me'i'on. <sup>19</sup>¿Queta ti qui atesu a'inga Chiga manda'choma? Faesumbe pushei'ccu cansejama. A'ima fi'ttijama. Cca'najama. Cca'inga afopoenjama. Afopoenjama tisu ti'tsse isuye. Que yaya, que mamama ñotsse in'jamba pañajan.

<sup>20</sup>Qquen susi tsandieja su:

—Atesian'su, tsamajan pa'ccoma gi pañamba canse chuitepie.

<sup>21</sup>Jesús tsandiema ñotsse in'jamba camba su:

—Fae tsoña'cho tsu shaca. Japa pa'cco que an'bian'choma chavaenjan. Chavaemba corifin'dima isupa mendeqquianga afeja. Tsayita qui Chiga sefacconi ricove daya. Tsa'caen tsomba jipa ñai'ccu fae'ngae paya'ngae jacanjan.

<sup>22</sup>Tsama pañamba ñoquimbipa ñombi'yé ja panshaen ricopa.

<sup>23</sup>Tsonsi Jesúsja tisema shondosundeccuma piyicamba su:

—Aiyepa tsu majan osha'choma an'bian'cho Chiga a'ive daye.

<sup>24</sup>Tsa'caen susi tisema shondosundeccuja asi'ttaembra can'boen'fa.

Tsa'ma Jesúsja ccase su:

—Dusutssi'pa, majan tise an'bian'choma panshaen in'jan'da ñoa'me aiyepa tsu tiseja Chiga a'ive daye. <sup>25</sup>Nane bove aiyepambi tsu camello nojan'cco chango'ye panshañe. Ti'tsse aiyepa tsu rico Chiga a'ive daye.

<sup>26</sup>Qquen susi pañamba ti'tsse asi'ttaembra can'boen'fa. Asi'ttaembra tisupapora iñajampaña'fa:

—Tsa'caenda ¿majan tsu ccushaye'ja osha?

<sup>27</sup>Tsa'ma Jesús tise'pama camba su:

—Aindeccuja osha'fambi tsa'caen tsoñe. Tsa'ma Chigaja osha. Nane Chigaja osha'choma oshacho.

<sup>28</sup>Tsonsi Pedro afaye ashaemba su:

—Na'su, ingija pa'tssi tisu an'bian'choma catipa gi quei'ccu jacan'fa.

<sup>29-30</sup>Tsonsi Jesúsja su:

—Ñoa'me gi su, majan a'i ñama in'jamba, va ccushaya'chone ñotsse condase'choma in'jamba osha'choma cati'ta ja'i tsu ñoa'me ti'tsse'tssia've isuya. Nane majan tise tsa'o, tise antiandeccu, tise yaya, tise mama, tise pushe, tise dushundeccuma, tise andema'qque cati'ta tsaja toya va andeni cansepa tsu injan'tsse isuya. Nane tsa'o, antiandeccu, mamandeccu, dushundeccu, andeve'qque ti'tsse tsu isuya. Toya'caen tsa'caen da'fasi cca'indeccuja tisema chi'gapa in'jangae tsincon'faya. Tsa'ma jai'ngae tsa chi'ga'cho tsu tsangae canse'pama isuya. <sup>31</sup>Nane tsain'bio majan ja'ño joccapatssiandeccuja utu'ccoe tsu da'faya. Toya'caen tsain'bio majan ja'ño utu'ccoe andeqquiaja tsequi a'ta joccapatssia've tsu da'faya.

**Ccase Jesús tisu paya'chone condase**  
*(Mt 20.17-19; Lc 18.31-34)*

<sup>32</sup>Tsaiqui'ye Jerusaléni ansunde jipa Jesúsja tisema shondosundeccuma o'tie jayi. Tise'paja asi'ttaen jayi'fa. Nane dyojo'tsse Jesúsma omboen jayi'fa. Tsonsi Jesúsja tisema doce shondosundeccuma ttu'sepa ccase ccani angapa tisuma ma'caen tson'faya'choma conda. <sup>33</sup>Qquen tsu su:

—Que can'faja. Jerusaléni gi jayi'fa. Tseni japa gi Sefaccone Ji'cho A'i indiyepa afeyeya Chigama afa'su nasundeczunga, Chiga manda'choma atesiansundeccunga. Tsendeccu tsu ñama fi'tti'faye mandapa israembindeqqianga ñama afe'faya. <sup>34</sup>Tsendeccu tsu ñama da'ñomba afa'faya. Tsomba ñanga attupoemba tsse'tsse'faya. Tsa'caen tsse'tsse nanimba tsu ñama fi'tti'faya. Tsa'ma papa gi tres a'tangae ccase qquendyaya.

**Santiago, Juan tisu in'jan'cho**  
*(Mt 20.20-28)*

<sup>35</sup>Tsonsi Santiago, Juan (tsendeccuja Zebedeo dutssiyendeccu) Jesúsnga catsepa su'fa:

—Atesian'su, in'jan'fa gi que ingi in'jan'chove tsoñe.

<sup>36</sup>Tsa'caen susi Jesúsja iñajampaña:

—¿Jongoesuve tsoñe qui in'jan'fa?

<sup>37</sup>Tsonsi su'fa:

—In'jan'fa gi que na'suve dasi fa'leja que tansinfanga, faesuja que pavefanga dyaiye.

<sup>38</sup>Tsonsi Jesúsja su:

—Jongoesuve tisu iñajan'chove que'ija atesu'fambi. ¿Osha'fa ti qui ña cui'ccuma cu'içquia'caen vana'faye? ¿Osha'fa ti qui ña fetiye'chonga fetiyeqquia'caen vana'faye?

<sup>39</sup>Qquen susi tise'paja su'fa:

—Osha'fa gi.

Tsonsi Jesúsja su:

—Ñoa'me ña cui'ccuma cu'içquia'caen qui vana'faya. Ña fetiye'chonga fetiyeqquia'caen qui vana'faya. <sup>40</sup>Tsa'ma ña tansinfanga, ña pavefanga dyaiya'choveta ñajan antteye oshambi. Tsamajan antteya'cho majanga Chiga tayo in'jamba ñoña'chonga.

<sup>41</sup>Qquen su'je'fasi faesu diez shondosundeccu pañamba Santiago, Juanma iyicca'ye'fa. <sup>42</sup>Tsa'ma Jesús tsendeccumma ttu'sepa su:

—Que'i in'janqquia'caen majan cocama na'suve dapa ti'tsse mandaye tsu atesu'fa. Majan ti'tsse ñoa'me'qque na'su tsu faesu bove'ccoama manda. <sup>43</sup>Tsa'can'faya'bi qui que'ija. Majan que'i'su ti'tsse na'suve daye in'jan'choja faesuma fuiteya'cho. <sup>44</sup>Que'i majan joccapitssia na'suve daye in'jan'choja poimbe sema'suve daya'cho. <sup>45</sup>Tsa'caen ñajan,

Sefaccone Ji'cho A'ita gi faesuma mandaye jimbi. Nane faesuma fuiteye gi ji. Tisuma afepa poimbe shacama afepoeñe gi ji ccushaya'chone.

### Bartimeo binisi Jesús ccushaen

(Mt 20.29-34; Lc 18.35-43)

<sup>46</sup>Tsomba napi'fa Jericó canqqueni. Napipa can'jenccapa Jesús, tisema shondosundeccu, tsain'bio a'i'lqque tse'ttie sombopa jayi'fa. Jayi'fa'nii fae bini, tsaja Bartimeo qquen inisecho'cho, Timeo dutssi'ye, tsaiqui utufani dyai. Tse'tti dyaipa corifin'dima iñajan'jen, va'chapa. <sup>47</sup>Jesús Nasareno'su pansonhanjin qquen pañamba binijan fundopa su:

—Jesús, David Dutssi'ye, ñama mende'yeja.

<sup>48</sup>Qquen fundo'jesi cca'indeccu tisema iyu'u'fa cuintsu ziyaye. Tsa'ma iyu'u'fa'nii'lqque ti'lsse'e fundo'je:

—David Dutssi'ye, ñama mende'yeja.

<sup>49</sup>Tsonsi Jesús ja ccutsupa su:

—Tisema ttu'se'faja.

Tsonsi japa binima su'fa:

—Dyombe jangipa jiha. Queue tsu ttuse'je.

<sup>50</sup>Tsonsi tise opoi'jema ttova catipa butto jangipa Jesúsnga catse. <sup>51</sup>Tise catsesi Jesúsja iñajampaña:

—¿Jongoesuve ña tsoñe qui in'jan?

Tsonsi binijan su:

—Na'su, atte'jeye gi in'jan.

<sup>52</sup>Tsonsi Jesúsja su:

—Jaye qui osha. Tayo qui ccusha ñama in'jamba.

Tse'fiae'ccuyi binijan atteye osha. Ccushapa Jesúsi'ccu tsaiqui'ye ja.

### Jesús Jerusaléni ca'ni

(Mt 21.1-11; Lc 19.28-40; Jn 12.12-19)

**11** <sup>1</sup>Jerusaléni ca'tsa napijipa Betfagéni, Betanianí napi'fa. Tseni Olivo ccotta'cco pporotsse napiipa dos tisema shondosundeccuma manda moen <sup>2</sup>qquen supa:

—Ja'faja tseni tsa canqque pporotsse. Tsenima qui atte'faya boro du'shuma, tandan ccutsian'choma. Tsangaja majañii'lqque otsepa dyaipa jacan'fambi. Tsama ccupapa i'faja vani. <sup>3</sup>Majan jongoesie qui tson'jen'fa qquen iñajampaña'nijan su'faja: “Na'su tsu vanga dyaipa japa ccase ipa afeya.”

<sup>4</sup>Tsa'caen susi japa atte'fa boro du'shuma, tsa'o sombo'tti pporotsse tsaiqui utufanga tandan ccutsian'choma. Attepa ccupa'fa. <sup>5</sup>Ccupa'je'fasi attepa tse'tti can'jensundeccu iñajampaña'fa:

—¿Mincon'jen'fa qui? ¿Jongoesie qui boro du'shuma ccupa'je'fa?

<sup>6</sup>Tsonsi tise'paja Jesús suququia'caen su'fa. Tsa'caen susi angaye antte'fa.

<sup>7</sup>Tsa'caen tsonsi boro du'shuma Jesúsnga angapa tise'pa sarupama

boronga oppoen'fa cuintsu Jesús tsanga dyaiye. Tsa'caen ñoña'fasi Jesús otsepa dyaipa ja. <sup>8</sup>Tsa'caen dyaipa jayisi tsain'bio a'i tise'pa oppoen'jen'cho sarupama tsaiquinga ppappa'fa. Cca'indeccuja japa ccaquejema chattupa ipa tsaiquinga ppappa'fa tsaiquima ñotsse ñoñañe. <sup>9</sup>Toya'caen o'tie jayindeccu, sepaccofae jiñadeccu'qque qquen fundo'fa:  
—Avuja'faja. Ñoa'me ñotssi tsu Na'su Chiga mandasi ji'cho. <sup>10</sup>Ñoa'me ñotssi tsu tayopi'su Na'su David mandaqquia'caen tiseja Na'suve dapa mandaye. Chiga sefacconisundeccu'qque avuja'faja.

<sup>11</sup>Jesús tsa'caen Jerusaléni ca'nimba Chiga ettinga ca'ni. Ca'nimba pa'tssi osha'choma camba sombopa Betaniani ja. Nane tayo simesi tisema shondosundeccu'ccu tseni ja'fa.

**Jesús higuera'jin name mechosi iyu'u**  
(Mt 21.18-19)

<sup>12</sup>Ccaqui a'ta Betaniane sombopa jayipa Jesúsja qquipoe'su.  
<sup>13</sup>Qquipoe'supa higuera'jima biane attepa teta'choma pishoye ja. Higuera'jin naje'paja teta'choma an'biaña qquen in'jamba japa najemeñi atte. Nane tise naitembisi name mecho. <sup>14</sup>Tsa'caen mechosi Jesúsja higuera'jima su:

—Minguite'qque majañi'qque an'faya'bi tsu que teta'choma.

Qquen su'je'choma tisema shondosundeccuja paña'fa.

**Chiga ettini'su chavaensundeccu**  
(Mt 21.12-17; Lc 19.45-48; Jn 2.13-22)

<sup>15</sup>Tsomba Jerusaléni napipa Jesúsja Chiga ettinga ca'ni. Ca'nimba tseni chavaensundeccuma, chavasundeccuma'qque tteyaye ashaen. Nane corifin'dima cambiansundeccumbe mesama qqui'tssa ttova'ccoen. Ppuppuju'choma chavaensundeccumbe siyetama'qque tsa'caen tson.  
<sup>16</sup>Majañi'qque Chiga etti'ye andupa jaye anttembi. <sup>17</sup>Tsa'caen tsomba atesian'jemba su:

—Chiga Tevaen'jenga Chiga tsu su: “Ña tsa'ota tsu poi ande'su a'ine ñama iñajan'jentti.” Tsa'ma que'ija va tsa'oma ccanamba tsa'ove tson'fa.

<sup>18</sup>Jesús tsa'caen atesian'jensi poiyi'cco a'i pañamba tise atesian'jen'choma in'jan'fa. Tsa'cansi Chigama afa'su nasundeccu, Chiga manda'choma atesiansundeccu'qque tsama atesupa panshaen paña'fasa'ne dyopa ttatta'fa ma'caen Jesúsma fi'ittiya'chove. <sup>19</sup>Tsa'caen tson'jen'ni tayo cose jisi Jesúsja canqque'ye sombopa ja.

**Higuera'jinjan tayo samba**  
(Mt 21.20-22)

<sup>20</sup>Ccaqui a'ta sinte'yi panshan jimba higuera'jima atte'fa setsa'chone tayo pa'cco samba'choma. <sup>21</sup>Attepa Pedroja Jesús su'choma in'jamba tisenga su:

—Atesian'su, que canjan, que iyu'upa susi jhiguera'jin tayo samba!

<sup>22</sup>Tsonsi Jesúsja su:

—Chigave in'jan'faja. <sup>23</sup>Nane ñoa'me gi su, majan a'i va ccotta'ccoma "Joqquitssipa marnga jaja" qquen susi tsa'caen tsu jaya. Nane tisu injama'cho shacambipa, "tisu suququia'caen tsu daya," qquen in'jan'ninda tsa'caen tsu daya. <sup>24</sup>Tsa'cansi gi su pa'cco jongoesuve qui Chigama iñajamba isuya qquen in'jan'da tsa'caen qui isuya. <sup>25</sup>Chigama iñajan'jen'da tisu majain'ccu iyiccaye'je'choma in'jamba japa ñoquiaña'cho. Tsa'caen tsonsi tsu Chiga que'i Quitsa sefacconi canjen'su'qque que'i egae tsincon'choma joqquitssiamba ñoquiya. <sup>26</sup>Nane que'i ñoquian'fambian'da tsa'caeñi tsu Chiga que'i Quitsa sefacconi canjen'su'qque que'i egae tsincon'choma joqquitssiaña'bi.

### Jesús na'sia'caen manda

(Mt 21.23-27; Lc 20.1-8)

<sup>27</sup>Tsomba toequi Jerusaléni ccase ji'fa. Tseni jipa Chiga etti'ye jaca'ní Chigama afa'su nasundeccu, Chiga manda'choma atesiansundeccu, coenzandeccu'qque Jesúsma can'su jipa <sup>28</sup>iñajampaña'fa:

—¿Majan na'su in'jaensi qui queja tsa'caen tsincon? ¿Majan tsu quema manda antte na'sia'caen mandaye?

<sup>29</sup>Qquen su'fasi Jesúsja su:

—Ña'qque gi que'ima iñajampañaña. Que'i ñanga condasi gi ña'qque condaya ma'caen ña tsincon'choma. <sup>30</sup>Juan feti'chota ¿sefacconi'su Chiga mandasi feti'cho ti? Tsambi'ta ¿a'i mandasi feti'cho ti? Conda'faja ñanga.

<sup>31</sup>Tsonsi asi'ltaemba tisupapora afacco'fa:

—¿Jongoesu qquen gi su'faya? "Sefacconi'su Chiga mandasi feti'cho tsu" qquen su'ninda tsu sua "Tsa'ca'nijan ¿micomba qui Juanma pañamba in'jan'fambi?" <sup>32</sup>Tsambi'ta "a'i fetiye manda qquen su'ninda" ¿...jm jm?

Nane poiyi'cco a'i Juanjan ñoa'me Chiga Aya'fama afa'su qquen su'fasi atesupa nasundeccuja dyojo'fa. <sup>33</sup>Tsa'camba Jesúsnga su'fa:

—Atesu'fambi gi.

Tsonsi Jesúsja su:

—Jen'da ña'qque que'inga condaya'bi gi majan mandasi ña tsa'caen tsincon'choma.

### Ega semasundeccune condase'cho

(Mt 21.33-46; Lc 20.9-19)

**12**

<sup>1</sup>Tsa'caen tsomba Jesúsja condase'choi'ccu condaseye ashaemba su:

—Fae a'i can'jemba tise andenga tsajaccuve jon.

Tsomba tseccuma ttu. Ttupa patu changove ñoña tsaja tsa'ccuma somboeña'chove. Toya'caen se'fatssia tsa'ove'qque tsao'ña tsalye tisu caña'jeña'chove.

Pa'ccoma ñoñamba na'suja faesu semasundeccunga tsa tsajaccuma afe cuintsu sema'faye. Afepa ccani japa can'jen. <sup>2</sup>Tsajaite napisi fa'e tise a'ima manda maña semasundeccuni cuintsu japa tai'fa'choma na'sumbe enttingeve isuye. <sup>3</sup>Tsa'ma semasundeccuja tsama indipa tsse'tssepa me'ccoeyi moen'fa. <sup>4</sup>Tsonsi na'su faesu tise a'ima manda maña. Tsonsi tsama'qque patupa'e ttovaccoen'fa. Tsa'caen tsomba tsovema iñacaembra afase moen'fa. <sup>5</sup>Tsonsi na'su faesuma moensi tsamajan fi'tti'fa. Tsonsi tse'ltieja tsain'bitssi a'ive manda maña. Tsa'ma tsendeccuma'qque majama tsse'tssepa majamajan fi'tti'fa.

<sup>6</sup>Toya fae'cco tise dutssi'yeyi can'jen. Tsamajan tise ñotsse in'jan'cho. Jai'ngae tsama'qque manda moen qquen asi'ittaemba "Ña dutssi'yemanda tsu paña'faya." <sup>7</sup>Tsama attepa semasundeccuja tisupapora afacco'fa: "Va tsu ñoa'me na'sumbe dutssi'ye. Na'su pa'nijan vaja pa'cco na'su an'bian'choma tsu isuya. Jinge tisema fi'ttipa tsajaccuma tisupambe isufaye." <sup>8</sup>Tsa'caen in'jamba indipa fi'ttipa tise a'i'voma tsajaccumbe ccafanga ttova cati'fa.

<sup>9</sup>Tsa'caen tson'fa'nijan ¿ma'caen tsu ande na'suja tsoña? Nane tiseja jipa tsa semasundecuma fitti'tti sefaemba faesundeccunga tsa andema afeya.

<sup>10</sup>Can'fambi ti qui Chiga Tevaen'jen qquen su'choma:

Tsaoñasundeccu in'jambipa  
joqquitssian'fa'cho patu tsu  
ñoa'me ti'tsse joccaptissia  
patuve da.

<sup>11</sup>Tsa'caen tsu Na'suja tson.

Ingija attepa can'boemba "Ñotssi tsu" qquen asi'ttaen'fa.

<sup>12</sup>Tsonsi nasundeccu tsama pañamba Jesúsma indiañe in'jan'fa tayo atesupa Jesúsja tise'pama in'jaen su'chosi. Tsa'ma aindeccuma dyojopa anttepa ja'fa.

### Goviernonga afepoen'chone Jesús condase

(Mt 22.15-22; Lc 20.20-26)

<sup>13</sup>Tsomba tse'i Jesúsnga manda moen'fa majan fariseondeccuma, majan na'su Herodes aindeccuma'qque cuintsu japa Jesúsma iñajampañamba qqueña'faye. Nane qqueñañe in'jan'fa tise shacama atteye. <sup>14</sup>Tsa'caen manda'fasi jipa su'fa:

—Atesian'su, queja poiyi'cco a'i fae'ngatssi qquen in'jamba qui Chiga tsaiquine tansintsse atesian'jen. Nane a'i ccaningae su'choma pañambipa qui dyombi'tsse tansintsse atesian'jen. ¿Chiga manda'chota ti antte cuintsu na'su César iñajansi impuestoma afeye? Tsambi'ta ¿se'pi ti? ¿Afepoen'faya'cho ti gi? Tsambi'ta ¿afepoen'faya'bi ti gi?

<sup>15</sup>Tsa'ma Jesúsja tise'pa aququia afa'fa'choma atesupa su:

—¿Jongoesie qui ñama qqueña qquenjan tson'jen'fa? I'faja corifin'dima ña atteye.

<sup>16</sup>I'fasi Jesús attepa iñajampaña:

—¿Majambe tsove'ju, majambe inisema tsu vanga tevaen'cho?

Tsonsi tise'paja sul'fa:

—Na'su Césarmbe.

<sup>17</sup>Tsonsi Jesúsja su:

—Tsa'caenda Césarmbemajan Césarnga afe'faja. Toya'caen Chigambemajan Chiganga afe'faja.

### Papa ccase qquendyaya'cho

(Mt 22.23-33; Lc 20.27-40)

<sup>18</sup>Omboe Jesúsnga ji'fa saduseondeccu. Tsendeccuja pa'cho ccase qquendyaya'bi qquen supa Jesúsma iñajampaña'fa:

<sup>19</sup>—Atesian'su, tayopi Moisésja ingima mandapa tevaen cuintsu a'i du'shuve mechoyi pasi tsambe pushe toya canse'nijan pa'chombe quinshiñi tsu pa'chombe pushema pusheya'cho. Tsomba tsu du'siaña'cho tise quindya'yembe inisema aqque'pasa'ne. <sup>20</sup>Nane vani ingi'ccu siete tsandie fae antian'suyi can'jen'fa. Coenzaja o'tie pushepa du'shuve mechoyi pa. <sup>21</sup>Pasi tsandupajen'choma quinshin coenza pushe. Tsa'lque du'shuve mechoyi pa. Tsonsi faesu quinshin bove ch'u'a'lque tsandupajen'choma pushepa tsa'caeñi pa. <sup>22</sup>Nane tsa'caen poiyi'cco siete tsandie tsama pushepa du'shuve mechoyi pa'fa. Sepaccoe tsa pushesu'lque pa. <sup>23</sup>Tsa'caen tsomba a'i ñoa'me ccase qquendyaya'hinda ¿majambe pusheve tsu daya? Ñoa'me poiyi'cco siete tsandie tsu tisema pushe'fa.

<sup>24</sup>Pañamba Jesús tise'pama su:

—Que'ija Chiga Tevaen'jema ñotsse atesumbipa qui tsa'caen qque'fa. Toya'caen Chiga osha'choma oshachosi qui tsama'lque atesumbipa qque'fa. <sup>25</sup>Nane a'i papa ccase qquendyapa pushe'masia, tsa'ndu'masia tsu. Tise'pa dushundecuma'lque antte'faya'bi pusheye, tsa'nduye. Tsa'ma Chigambe sefacconi'su shondosundequia'caen pa'masiave dapa canse'faya. <sup>26</sup>Toya'caen pa'chondeccu ñoa'me ccase qquendyaya'chone ¿can'fambi ti qui Moisés tayopi tevaen'choma? Nane Moisés tsu tevaen ma'caen Chigaja quini'si anchanda'je'ttie tisenga afa'choma: “Ña gi Abraham, Isaac, Jacob Chiga.” <sup>27</sup>Nane Na'su Chigaja pa'chombe Chigambi tsu. Tsa'ma cansendeqquiambe Chiga tsu. Tsa'cama qui ñoa'me qque'fa.

### Chiga ti'tsse'tsse manda'cho

(Mt 22.34-40)

<sup>28</sup>Toya'caen fa'e Chiga manda'choma atesian'su Jesúsi'ccu condasecco'fa'choma paña. Pañamba Jesús ñotsse afasi atesupa catsepa iñajampaña:

—¿Majan tsu Chiga manda'cho ti'tsse'tssia?

<sup>29</sup>Tsonsi Jesúsja su:

—Ti'tsse'tsse manda'cho tsu qquen: “¿Paña'faja israe aindeccu! Na'su ingi Chiga, tsayi tsu Na'suja. <sup>30</sup>Pa'cco que injama'choi'ccu

Chiga que Na'suma ñotsse in'jan'faja. Nane pa'cco que canse'pai'ccu, pa'cco que in'jan'choi'ccu, pa'cco que ai'voi'ccu Tisema ñotsse in'jan'faja." Tsa tsu o'tie tsoña'chove manda'cho. <sup>31</sup>Toya'caen faesu manda'cho'qque fae'ngatssiqquia'can tsu: "Tisuma in'janqquia'caen faengasundecuma'qque in'jaña'cho." Me'i'on tsu faesu manda'cho vama ti'tsse'tssiave.

<sup>32</sup>Tsonsi Chiga manda'choma atesian'suja su:

—Atesian'su, ñotsse qui su. Ñoa'me tsu fae Chigayi jin. Me'i'on tsu faesu tsama ti'tsse'tssiave. <sup>33</sup>Nane pa'cco injama'choi'ccu, pa'cco canse'pai'ccu, pa'cco in'jan'choi'ccu, pa'cco ai'voi'ccu Chigama in'jañe, toya'caen tisuma in'janqquia'caen tisupapora in'jañe'qque –tsa tsu pa'cco oque oraen'choma bove ñotssi. Tsa tsu pa'cco Chiganga fi'ttipa afe'choma'qque bove ñotssi.

<sup>34</sup>Tsa'caen susi Jesúsja tsa a'i ñotsse in'jansi atesupa su:

—Pan qui napiji Chiga a'ive daye.

Tsonsi majañi'qque ccase catsepa iñajampaña'fambi.

*¿Majambe dutssi'ye tsu Cristoja?*

(Mt 22.41-46; Lc 20.41-44)

<sup>35</sup>Tsomba Jesús Chiga ettinga atesian'jemba su:

—¿Ma'caen tsu Chiga manda'choma atesiansundecuja "Chiga in'jan'cho Cristoja David Dutssi'ye tsu" qquenjan su'fa? <sup>36</sup>Nane Davidja Chiga Qquendya'pa tisema in'jaensi qquen afa:

Na'su Chigaja ña na'sunga su:

"Ñai'ccu fae'ngae na'suve dapa va'ttinga dyajia ña tansinfanga ña quema iyiccyesundecuma patsusi que tsu'tte tsosiccunga ccuiqquia'caen oshambipa quema paña'faya'gae."

<sup>37</sup>Nane David tsa'caen "Ña na'su" qquen susi ¿ma'caen tsu tiseja David dutssi'yeya?

Qquen atesian'jensi tsain'bio a'i Jesúsma avujatsse paña'fa.

*Jesúsja atesiansundecuma iyu'u*

(Mt 23.1-36; Lc 11.37-54; 20.45-47)

<sup>38</sup>Jesúsja atesian'jemba su:

—Injama'tse in'jan'faja manda'choma atesiansundeqquia'caen tsonsa'nne. Nane tsendecuja bia'a seda ondiccu'jema ondiccuye in'jan'fa. Tsaiqingae jayi'fasi poiyi'cco tise'pama atte'ta ñotsse tise'pama chigambiañe in'jan'fa. <sup>39</sup>Tsendecuja atesian'jenttinga ja'a'qque bove ñotssia dyaiipa'chove ttatta'fa. Fiestama panshaen'jeni'qque nasundecui'ccu fae'ngae dyaiipa aña in'jan'fa. <sup>40</sup>Pajaen'chondeccumbe tsa'oma'qque itsapa'fa. Tsomba cca'lndeccu tise'paja ño'a qquen in'jan'faye bia'ave Chigama iñajan'fa. Tsendecu tsu ti'tsse catiye'faya'cho.

**Tsandupajen'cho Chiganga afe'cho**  
*(Lc 21.1-4)*

<sup>41</sup> Tsomba fae a'ta Jesúsja Chiga ettini can dyai Chiganga afe'cho corifin'dima ppiña'jen'cho jin'tti. Ma'caen aindeccu corifin'dima ppiña'jen'choma can dyai. Tsanga majan ricondeccuja tsain'bitssi corifin'dive ppiña'fa. <sup>42</sup> Tson'jen'ni fae tsandupajen'cho jipa dos findi'ccoe ppiña fae reave bare'choma. <sup>43</sup> Tsama attepa Jesús tisema shondosundecuma ttu'sepa su:

—Ñoa'me gi su, va'cha pajen'cho tsu cca'ima ti'tsse ppiña corifin'dima ppiña'jen'chonga. <sup>44</sup> Nane pa'o a'i tise'pa tayo chavasi antteye'choma ppiña'fa. Tsa'ma tiseja mechopa pa'cco tise chavapa canseye an'bian'cho corifin'dima afe.

**Chiga ettima asi'tta'faya'cho**  
*(Mt 24.1-2; Lc 21.5-6)*

**13** <sup>1</sup> Jesús Chiga etti'ye sombopa jayisi fa'e tisema shondo'su tisenga su:  
 —Atesian'su, ¡que canjan, va patu randei'ccu tsao'ña'cho  
 ñoncca'osi!

<sup>2</sup> Tsa'ma Jesús pañamba su:  
 —¿Ñotssiate ti qui atte va rande ettima? Ñoa'me gi su, ni fae  
 patuyi'qque faesu patumbe ombani ottaya'bi. Pa'ccoma tsu asi'tta'faya'cho.

**Osefaeña'cho a'tane canjaen'cho**  
*(Mt 24.3-28; Lc 21.7-24; 17.22-24)*

<sup>3</sup> Tsomba Olivo ccotta'cconga jaja'fa Chiga etti tansien. Jesús tseni japa dyaisi Pedro, Santiago, Juan, Andrés'qque tisuyi tisei'ccu can'jemba qquen iñajampaña'fa:

<sup>4</sup> —In'jan'fa gi que inginga condaye, ¿minga'ni tsu que suquia'caen napiya? ¿Jongoesuma attepa gi osefaeña'cho a'ta napiji'chove atesu'faya?

<sup>5</sup> Qquen su'fasi Jesúsja su:  
 —Injama'tse majandeccu que'ima afopoemba qqueñasa'ne. <sup>6</sup> Chigaja ñama moen a'ima ccushaen'suve. Tsa'ma tsain'bio a'i tsu jipa: “Ña gi Chiga in'jan'cho Cristo” qquen afopoen'faya. Qquen supa tsain'bio a'ima tsu qqueña'faya.

<sup>7</sup> Tsa'ma geraen'jen'fa'choma, toya'caen ja'i geraen'faya'choma paña'an'qque dyombe can'faja. Tsaveqque'su tsu. O'tie tsu tsa'caen tsoña'cho. Tsa'ma tse'faei'ccuyi osefaeña'bi. <sup>8</sup> Nane fae ande'su faesu ande'sui'ccu iyicco'faya'cho. Fae na'su faesu na'sui'ccu iyiccopa geraen'faya'cho. Ande'qque cca'tti cca'tti oya'jeya. Cca'tti cca'tti aindeccuja qquipoe'su'faya. Toya'caen cca'tti cca'tti aindeccuja qquejian'faya. Tsa'ma tsaja me'detsse canse'faye ashaen'cho tsu.

<sup>9</sup> ;Que'iyi'qque in'jan'faja! Que'ima indipa nasundeccu bo'fa'chonga afe'faya cuintsu iyu'u'faye. Nane Chigane atesian'jenttinga angapa que'ima ma'ppi'faya. Que'i ñama in'jansi tsu que'ima ccutsian'faya quini'ccopandequivianga, ande nasundeccunga'qque. Tsa'caen ccutsian'fasi qui tise'panga ñane ñotsse afa'faya. <sup>10</sup> Nane osefaeña'cho a'ta napimbi'te tsu va ñotsse condase'choma poi ande'su a'inga condaseya'cho. <sup>11</sup> Que'ima nasundeccunga anga ccutsian'fasi dyombe can'faja ma'caen afaya'choma. In'jambe can'faja. Tsequi a'ta tsu Chiga Qquendya'pa que'ima afaeña. Afaensi tsa'caen conda'faja. Ñoa'me que'ija afa'faya'bi qui. Tsa'ma Chiga Qquendya'pa tsu afaya. <sup>12</sup> Antianda tsu tise antiama fi'ttiye afeya. Yayata tise du'shuma; dutssiyendeccuta tise'pa yayandecuma iyicca'yepa afe'faya cuintsu fi'tti'faya. <sup>13</sup> Nane que'ija ñame in'jamba chigaye'faya poiyi'cconga. Tsa'ma majan ta'etssia injama'chopa osefaeña'gae quiña'da tsu ccushaya.

<sup>14</sup> Tayopi'su Chigama afa'su Daniel egae dyoña'su napiya'chone tevaen. Tsa napi'ta osha'choma tsu tsangae dañoña. Nane tsa ccutsu'ma'ttia'ni ccutsusi atte'ta poiyi'cco majan Judea andeni can'jen'da ccotta'cconga tsu ccuya'faya'cho. (Majan va tevaen'jema can'da ñotsse in'janjan.) <sup>15</sup> Tsequi a'ta majan tsao'cco omba'su ppappacconi can'jen'da tsosiccuni'su cuartonga jongoesuve isuye andembe'yí tsu japa ccuya'faya'cho. <sup>16</sup> Majan nasipani can'jen'da tsaoni tise sarupave jimbe'yí tsu japa ccuya'faya'cho. <sup>17</sup> Va'cha pushesundeccuja majan suri, majan du'shuma chochoen'jen'cho'qque. Tsequi a'ta tsu vana'faya. <sup>18</sup> Chigama tsu inajaña'cho sanfainte tsa ccuyaya'cho a'ta napis'a'ne. Nane sanfainte napi'ninda ñoa'me tsu ti'tsse vana'faya. <sup>19</sup> Nane andeve agatointe ashaen'cho ja'ñó'qque a'ija tsa'caen vana'fambi. Jai'ngae'qque a'ija tsa'caen ccase vana'faya'bi. <sup>20</sup> Nane Chiga tsa'caen vanaña'cho a'tave agattoccoeyi anttembiecan'da ñoa'me tsu poi a'i pa'faye'can. Tsa'ma Chigaja Tise ttu'se'cho aindeccuma ccushaeñe in'jamba tsa'caen vanaña'chove agattoccoeyi antte panshaen vana'fasa'ne.

<sup>21</sup> Tsa'cansi que'inga majan a'i "Que canjan, va'tti tsu Cristoja can'jen," tsambi'ta "Que canjan, tseni tsu can'jen," qquen su'ní'qque tisema paña'fajama. <sup>22</sup> Nane afopa'cho Cristondeccu, afopa'cho Chiga Aya'fama afasundeccu tsu attian'faya. Attiamba ñoa'me ti'tsse'tssia canjaen'cho, osha'cho agattoen'choma'qque tsu canjaen'faya a'lma qqueñañe. Nane osha'ta tsu Chiga ttu'se'chondeccuma'qque qqueña'faya. <sup>23</sup> Tsa'ma ñotsse in'jan'faja. Toya tsa'caen tsombi'te gi que'inga conda que'i injan'jen'faye.

### Sefaccone Ji'cho A'i ccase jiya'cho (Mt 24.29-35, 42-44; Lc 21.25-36)

<sup>24</sup> Tsequi a'ta vanañjen'cho pasasi coejechiga tsu si'ame daya. Cose'suchiga'qque chanjuña'bi. <sup>25</sup> Sefacconi'su o'fe'qque amppi'faya. Nane pa'cco sefacconi'su jincho'cho'qque oya'faya. <sup>26</sup> Tsensi qui atte'faya Sefaccone Ji'cho A'i sefacconi'su unjimba'cco'ye dyai jiña'choma. Ñoa'me joccaptssia

a'tatssiai'ccu jiñamba <sup>27</sup>tisema sefacconi'su shondosundeccuma tsu manda moeña poi biani'su andeni japa Tise ttu'sepa in'jan'chondeccuma cuintsu i'nga'faye. Nane sefacco já ccutsuni'qque japa i'nga'faya.

<sup>28</sup>Higuera tetachojima camba atesu'faja. Ttemba cuname sombosí ccaqueje'qque chu'pasi coejefave daji qquen qui in'jan'fa. <sup>29</sup>Tsa'caen ña su'choma attepa qui in'jan'faya osefaeña'cho ca'tsa napiji, tayo sombo'ttinga napiquia'caen. <sup>30</sup>Ñoa'me gi su: Va ja'ño'su aindeccu toya pambi'te tsu pa'cco ña su'choja napiya. <sup>31</sup>Nane sefacco, ande'qque pasaya. Tsa'ma ña aya'faja pasaya'bi. Ñoa'me su'cho tsu. Ña suqquia'caen tsu daya.

<sup>32</sup>Tsa'ma maqui a'ta ma'can horani jiya'chove majañi'qque atesu'fambi. Nane Chigama sefacconi'su shondosundeccu ni ña, Chiga Dutssi'ye'qque gi atesumbi. Tsamajan Chiga Quitsayi tsu atesucho.

<sup>33</sup>Tsa'cansi ñotsse in'jamba caña'jen'faja. Toya'caen Chigama iñajan'jen'faja. Nane atesu'fambi qui maqui tsa hora napiya'chove. <sup>34</sup>Tsata tsu fae a'i biani jayipa tsal'o'ye toya sombombi'te manda tise aindeccuma. Nane poinga tise'pa sema'bave manda antte. Etti sombo'tti coira'suma'qque manda cuintsu ñotsse caña'jeñe. <sup>35</sup>Que'iija atesu'fambi qui minga'ni ña, tsal'o na'sia'caen, jiya'choma. Nane sime, tsambi'ta enttinge cose, arapa seyo'je'ni, sinte ji'ninda qui atesu'faya'bi. <sup>36</sup>Ñotsse in'jamba caña'jen'faja ña que'i ana'jen'fa'chonga jisa'ne. <sup>37</sup>Nane ña que'inga suqquia'caen gi poiyi'cconga su: ¡Ñotsse injan'jen'faja!

### Jesúsma indiye ñoña'fa

(Mt 26.1-5; Lc 22.1-2; Jn 11.45-53)

**14** <sup>1</sup>Toya tsu dos a'ta shaca Chiga panshaensi injienge'cho fiestama panshaeñe. Tsa fiestangaja pan cupana'ccove mechoama an'fa. Tsequi a'ta Chigama afas'u nasundeccu, Chiga manda'choma atesiansundeccui'ccu bopa ttatta'fa ma'caen Jesúsma afopoemba indipa fi'ttiya'chove. <sup>2</sup>Tsa'ma su'fa:

—Fiestama panshaen'jenquija indiye ega, pa'o a'i iyicca'yepa qquejian'fasa'ne.

### Ñome'bai'ccu Jesúsma onjoen'cho

(Mt 26.6-13; Jn 12.1-8)

<sup>3</sup>Tsomba Jesús Betanianni japa na congomba pajipa ccusha'cho Simón tsaoni can'jen. Tse'ttini can'jemba an'jen'cho mesa jin'tti piyive ccui'ni fae pushesu tisenga ji. Jipa ñotssia arabastro patu botiyama i. Tsa botiya on'ba'o ñoncca'a nardo ñome'ba jin. Tsaja tsain'bitsse bare'cho. Tsomba tsa botiyama fettapa Jesús tsovenga fiña onjoen. <sup>4</sup>Tsa'caen onjoensi majan tseni can'jensundeccu iyicca'yepa tisupanaccu su'fa:

—¿Micomba tsu ñome'bama tsa'caen aquia cati? <sup>5</sup>Nane chavaen'choecan'da tresciento corifin'dima ti'tsse isupa va'chandeccunga afeya'an.

Qquen supa tsa pushesuma ñoa'me iyicca'yepa'fa.

<sup>6</sup>Tsa'ma Jesúsja su:

—¡Antte'faja! ¿Jongoesie qui va pushesuma noñangian'fa? Ñoa'me ñotsse tsu tiseja ñama tson. <sup>7</sup>Tsangae tsu va'chandeccuja que'i'ccu can'jen'faya. Tise'pama maqui in'jan'da tsu mende'yeya'cho. Tsa'ma ñajan tsangae que'i'ccu can'jeña'bi. <sup>8</sup>Va pushesuja ma'caen oshapa tayo tsu tson. Nane ñome'bai'ccu ña ai'voma onjoemba ñama a'tu'faya'chone tsu tsa'caen tson. <sup>9</sup>Ñoa'me gi su: Poi ande'ye mani va ñotsse condase'choma condase'ta va pushesu tson'choma'qque tsu condase'faya cuintsu tisema injan'jen'faye.

**Judas Jesúsma afeye su**  
(Mt 26.14-16; Lc 22.3-6)

<sup>10</sup>Tsonsi fa'e Jesúsma doce shondosundeccu'su, tsa Judas Iscariote qquen inisecho'cho, Chigama afa'su nasundeccunga ja Jesúsma tise indipa afeye'chove condaye. <sup>11</sup>Tsama pañamba nasundeccu avujapa corifin'dima afeye su'fa. Tsa'caen su'fasi Judasja tta'tta ma'caen Jesúsma tise'panga afeye.

**Na'su Jesús an'jen'cho**  
(Mt 26.17-29; Lc 22.7-23; Jn 13.21-30; 1 Cor 11.23-26)

<sup>12</sup>Pan cupana'cco meccoa fiestama ashaen'jen'qui tsu Chiga panshaen'cho ovejama fi'ttiya'cho. Tsequi a'ta Jesúsma shondosundeccuja tisema iñajampaña'fa:  
—¿Mani qui in'jan ingi japa Chiga panshaen'cho injienge'cho fiestane aña'choma sho'ccoen'faye que aña?

<sup>13</sup>Tsa'caen su'fasi tisema shondosundeccuma dosve moen'jemba su:  
—Ja'faja canqqueni. Tseni qui cachui'faya fae tsandie, tsa'ccu tsoripama anga ji'choma. Tsai'ccu jaja'faja. <sup>14</sup>Mani ca'n'i'da su'faja tsa'o na'suma: “Atesian'su tsu su: ¿Mani tsu que cuarto cuintsu tseni ñajan ñama shondosundeccui'ccu Chiga panshaen'cho injienge'cho aña'choma aña?” <sup>15</sup>Tsonsi tsu rande cuarto sefanisu' ppappaccomma que'linga canjaeña. Tseni osha'cho tsu jin. Tse'ttinga ingimbe sho'ccoen'faja.

<sup>16</sup>Tsa'caen susi tisema shondosundeccu japa osha'choma Jesús suqqua'caen attepa Chiga panshaen'cho injienge'chone aña'choma sho'ccoen'fa.

<sup>17</sup>Tayo cose jisi Jesús tisema doce shondosundeccui'ccu ji. <sup>18</sup>Tsomba mesani piyive ccupa an'jemba Jesúsja su:

—Ñoa'me gi su, fa'e que'i'suyi ñai'ccu fae'ngae an'jen'cho, tsa tsu ñama chi'gapa cca'indeccunga afeya.

<sup>19</sup>Qquen susi tsendeccuja ñombi'yepa faesu, faesu tisema iñajampañañe ashaen'fa:

—¿Ñambi ti gi?

Toya'caen faesu'qque:

—¿Ñambi ti gi?

<sup>20</sup>Qquen su'fasi Jesúsja su:

—Nai'ccu fa'e apisho'ttongayi panma tssipoemba an'su tsu ñama afeye tson'jen. <sup>21</sup>Nane Chiga Tevaen'jen suqqua'caen Sefaccione Ji'cho A'ima

afesi indi'faya. Tsa'ma jva'cha tsu tisema afe'su! Nane tise've Tise mama isumbiecan'da tsu tisene bove ñotssiy'e'can.

<sup>22</sup>An'jembá Jesús panma isupa Chigama ñotsse afa. Afa nanimba panma doñamba tise'panga afe. Afepa su:

—An'faja. Va tsu ña ai'vo.

<sup>23</sup>Toya'caen tasama isupa ccase Chigama ñotsse afa. Afa nanimba tise'panga afe. Afesi poiyil'cco tsa tasa'suma cu'i'fa. <sup>24</sup>Cui'je'fasi Jesúsja su:

—Va tsu ña anjampa -Chiga a'l'ccu tseyi fae'ngae injancco'fa'chove canjaen'cho anjampa tsu. Tsain'bio a'ine ña anjampa tssamba catiyeya tise'pa egae tsincon'choma joqquitssiañe. <sup>25</sup>Noa'me gi su, ccatsse'qque vani cu'iya'bi gi o'fa tsaja vinoma. Jai'ngae Chiga Quitsa tise aindeccuma mandasi gi tseni tise'pai'ccu cuna vinoma cu'iya.

### Jesús conda Pedro a'tieña'choma

(Mt 26.30-35; Lc 22.31-34; Jn 13.36-38)

<sup>26</sup>Settapoen nanimba sombopa Olivo ccotta'cconga ja'fa. <sup>27</sup>Tseni japa Jesús tise'panga su:

—Quel'i poiyil'cco ja'ño cose qui dyopa ñama cati'faya. Nane Chiga Tevaen'jen suqqua'caen tsu ts'on'faya: "Oveja coira'suma ña fi'ttisi oveja tsu shequequin ja'faya." <sup>28</sup>Tsa'ma ña ccase qquendya'pa gi que'ima o'tie Galileani jaya.

<sup>29</sup>Qquen susi Pedroja su:

—Mapán cca'i dyopa quema cati'fa'ni'qque ñajan me'i.

<sup>30</sup>Tsa'ma Jesúsja su:

—Noa'me gi su, ja'ño cose'yí que'qque toya arapa dos se se'yombi'te tres se qui ñane a'tieña.

<sup>31</sup>Tsa'ma Pedroja ti'tsse su:

—Nane que'il'ccu fae'ngae paya'ngae ñajan quene a'tieña'bi.

Tsonsi poiyil'cco tsa'caen su'fa.

### Jesús Getsemaníni Chigama iñajan

(Mt 26.36-46; Lc 22.39-46)

<sup>32</sup>Tsomba Jesús, tisema shondosundeccui'ccu Getsemaní quini'ccosiccojini ja'fa. Tseni napipa tise'pama su:

—Va'tti dyai'faja. Ña Chigama iñajan'gaye.

<sup>33</sup>Qquen supa Pedro, Santiago, Juanma ti'tsse joccani anga. Angajipa asi'ttaemba dyojo'ccoye ashaemba injama'cho tsopipie ñoquimbipa <sup>34</sup>tsendecuma su:

—Injama'cho tsopipie paquicia'caen gi asi'ttaemba ñombi'ye. Va'ttinga catiyepa anambe caña'jen'faja.

<sup>35</sup>Qquen supa Jesúsja ti'tsse joccani ja. Japa andenga puvi ccuipa Chigama iñajan cuintsu osha'ta tise vanaña'cho hora pasaye. <sup>36</sup>Chigama iñajamba qquen tsu su:

—Yaya, Chiga Quitsa, queja osha'choma oshacho. Cui'ya'choma itsaqquia'caen va ña vanaña'choma joqquitssianjan. Tsa'ma joqquitssiañe in'jambi'ta que in'janquia'caen tsonjan. Ña in'jan'chomajan me'í.

<sup>37</sup>Iñajan nanimba tisema shondosundeccuni ji. Jipa ana'jen'fa'choma attepa Pedroma su:

—Simón, ¿ana'jen ti qui? ¿Oshambi ti qui ni fae horaveyil'qque caña'jeñe? <sup>38</sup>Ñotsse qquendyapa Chigama iñajan'jen'faja tisupa qquepa egae tsinconsa'ne. Nane injama'cho tsosipie in'jan'ma qui ai'veni shacapa tsa'caen tsoñe oshambi.

<sup>39</sup>Tsa'caen supa ccase japa otia've iñajanquia'caeñi iñajan. <sup>40</sup>Tsomba jipa ccase ana'jen'fa'chongayi ji. Nane anae'sui'ccuyi ccuipa osha'fambi jongoesu qquen afaya'chove. <sup>41</sup>Tsonsi ccase Chigama iñajan'gapa jipa su:

—¿Toya ti qui anamba ñofa'je'fa? Naniña tsu. Tayo tsu ña vanaña'cho hora napi. Ja'ño tsu Sefaccione Ji'cho A'ima egae tsinconsundeccunga afeya. <sup>42</sup>Jangi'faja. Jingé jaye. Ñama chi'gapa afe'su tsu tayo napi.

### Jesúsma indi'fa

(Mt 26.47-56; Lc 22.47-53; Jn 18.2-11)

<sup>43</sup>Tsa'caen Jesús toya afa'je'ni, Judas, fa'e Jesúsma shondosundecu'su, ji. Tsai'ccu tsain'bitssi a'i jiji'fa. Nane Chigama afasundecu, Chiga manda'choma atesiansundecu, israe'su coenzandeccu tise'pama manda moen'fasi matichi'ccu quini'ccoil'ccu ji'fa. <sup>44</sup>Judas, indiye afe'suja, toeni afafaemba su:

—Ña gi que'inga canjaeña majama indiya'chove. Majama ña mochapa chigambia'ninda tsama indipa anga'faja. Moensa'ne ñotsse tandamba anga'faja.

<sup>45</sup>Tsa'caen su'chopa Judasja Jesúsnga ji catsepa su:

—¡Atesian'su!

Qquen supa mocha.

<sup>46</sup>Tsonsi aindeccu attepa Jesúsma qquitssa indi'fa. <sup>47</sup>Tsa'ma fa'e Jesús'i'ccu ccutsu'su tisu matichima qquitssa somboemba Chigama afa'su na'sumbe sema'su tsonsinama qquerui ttova. <sup>48</sup>Tsonsi Jesús aindeccunga su:

—¿Nanda ti gi ccana'su? ¿Tsa'cansi ti qui matichi, quini'ccoil'ccuta ñama indiye ji'fa? <sup>49</sup>Nane poi a'ta gi Chiga ettinga dyaipa atesian'jen'ma qui ñama indi'fambi. Tsa'ma Chiga Tevaen'jen ñama fi'ttiya'chone tevaensi ja'ño tsu tsa'caen tsoña'cho ñoa'me su'cho qquen canjaeña.

<sup>50</sup>Qquen su'je'ni poiyi'cco Jesúsma shondosundecu tisuveyi tisema catipa ccuya'fa.

### Tsandie chu'a ccuyin ja

<sup>51</sup>Tsa'ma fae tsandie chu'a sarupai'ccuyi aí'voma fanangopa omboe jayi. Tsa'caen jayisi a'i tisema qquitssa indi'fa. <sup>52</sup>Tsa'ma tiseja sarupama catipa chu'ccoyi ccuyin ja.

**Jesúsja bo'fa'chonga ccutsu'cho**

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup>Tsomba tse'i joccapatssia Chigama afa'su na'suni Jesúsma anga'fa. Toya'caen poi Chigama afa'su nasundeccu, israe'su coenzandeccu, Chiga manda'choma atesiansundeccu'qque tseni bo'fa. <sup>54</sup>Pedroja biapie'yí japa joccapatssia na'sumbe tsal'o tsotefaniñi can'jen. Tsomba sundarondeccui'ccu si'ngeccufani sa'vu dyai.

<sup>55</sup>Tsonsi Chigama afa'su nasundeccu, pa'o nasundeccu bo'fa'cho'qque ma'caen Jesúsma afopoeña'chove ttatta'fa cuintsu Jesúsjia tsesuma shacaen qquen supa tisema fi'ttiye mandaye. Tsa'ma atte'fambi. <sup>56</sup>Nane tsain'bio a'lí aquia afopoén'fa Jesúsma. Tsa'ma ñotsse fae'ngatsse afopoén'fambi. <sup>57</sup>Tsonsi majandeccu jangi ccutsupa Jesúsma aquia afopoemba su'fa:

<sup>58</sup>—Ingita gi paña'fa tise su'choma: “Ñanda gi a'lí tsao'ñia'cho Chiga ettima osiamba tres a'tangae a'lí tsao'ñambi'choave ccase ccutsiaña.”

<sup>59</sup>Tsa'ma toyayi fae'ngatsse afa'fambi.

<sup>60</sup>Tsonsi Chigama afa'su na'suja nasundeccu enttingeye ccutsupa iñajampaña:

—¿Minga'osi qui afambi? ¿Jongoesie tsu jondeccuja quema ya'caen su'fa?

<sup>61</sup>Tsa'ma Jesúsjia fae ayafaveyi'qque afambi. Afambisi Chigama afa'su na'suja ccase iñajampaña:

—¿Que ti qui Chiga in'jan'cho Cristo? ¿Que ti qui Ño'a Chigambe Dutssi'ye?

<sup>62</sup>Tsonsi Jesúsjia su:

—Ju, ña gi. Nane que'ija atte'faya qui Sefaccone Ji'cho A'lí gi Osha'choma Oshacho'cho Chigambe tansinfani dyai'choma. Toya'caen qui atte'faya ña unjimba'cco'ye jiña'choma.

<sup>63</sup>Qquen susi Chigama afa'su na'suja iyicca'yepa tisu ondiccu'jema chittapa su:

—¿Toya ti shaca camba afasundeccuja? <sup>64</sup>Que'lí'qque qui tayo paña'fa tise Chigane egae su'choma. ¿Jongoe qquen qui in'jan'fa?

Tsonsi poiyi'cco Jesúsma fi'ttiye qquen su'fa.

<sup>65</sup>Tse'i majanjan Jesúsnga attupoeña ashaen'fa. Tise tso'fema'qque piccopa tsse'tssepa qquen su'fa:

—Injama'choi'ccu atesupa condaja majan tsu quema tssai.

Toya'caen sundarondeccu'qque tisema tivei'ccu ma'ppi'fa.

**Pedro Jesúsne a'tien**

*(Mt 26.69-75; Lc 22.56-62; Jn 18.15-18, 25-29)*

<sup>66-67</sup>Tsa'caen tson'jen'fa'ni Pedroja tsa'o tsotefani can'jemba savu'jesi Chigama afa'su na'suma coira'su pushesu jipa tisema atte. Attepa can'boemba su:

—¿Que'qque ti qui tsa Jesús Nasareno'sui'ccu jaca'n'su?

**68**Tsa'ma Pedroja a'tiemba su:

—Atesumbi gi tsamaja. Atesumbi gi jongoe qquen qui su.

Tsa'caen supa tsaofama ttu'cho sombo'ttima somboye jasi arapaja se'yo.

**69**Tsa'caen jayisi tsa coira'su pushesuja ccase tisema attepa can'boemba tse'tti can'jensundeccunga su:

—Va a'lja tsa'suyi tsu.

**70**Tsa'ma tiseja ccase a'tien. Omboe tse'tti can'jensundeccu ccase Pedroma su'fa:

—Ñoa'me qui queja tsa'su. Queja Galilea'su. Tsambe aya'fangae qui afa.

**71**Qquen susi Pedro Chigama iñajan tise tansintsse su'choma canjaeñe. Nane afopoen'ninda Chiga tisema egae tsoña'chove ttu'se. Tsa'caen ttu'sepa tsu su:

—Atesumbi gi tsa a'lma, majama qui afa'je'fa.

**72**Tse'fiae'ccuyi arapa gayo ccase se'yo. Se'yosi Pedroja Jesús su'choma in'jan: “Toya arapa dos se se'yombi'te tres se qui ñane a'tieña.” Tsama in'jamba Pedroja i'na.

### Jesúsma Pilatonga anga'fa

(Mt 27.1-2, 11-14; Lc 23.1-5; Jn 18.28-38)

**15**

<sup>1</sup>Tayo a'tasi toya sinte'yi Chigama afa'su nasundeccuja condasecco'fa coenzandeccui'ccu, Chiga manda'choma atesiansundeccui'ccu. Nane pa'cco nasundeccu bo'fa'choi'ccu condaseccopa in'jamba Jesúsma tandamba angapa governaror Pilatonga afe'fa. <sup>2</sup>Tsonsi Pilatoja Jesúsma iñajampaña:

—¿Que ti qui israendeccu na'su?

Tsonsi Jesúsja su:

—Que suququia'caen tsu.

**3**Tsa'caen su'je'ni Chigama afa'su nasundeccu Jesúsja egae tsincon'su qquen afopoen'jen'fa. **4**Tsonsi Pilatoja ccase Jesúsma iñajampaña:

—¿Mingalosi qui afambi? ¿Pañambi ti qui que egae tsincon qquen su'fa'choma?

**5**Tsa'ma Jesúsja tsa'caen su'ni'qque afambi. Afambisi Pilatoja ma'caen tsoña'chove atesumbi.

### Jesúsma fi'ttiye manda

(Mt 27.15-31; Lc 23.13-25; Jn 18.38-19.16)

**6**Poi canqque'fa fiestama panshaen'jenqui Pilatoja fa'e indiy'e'choma ccupaye atesu, majama a'l in'jamba iñajan'fa'nijan. **7**Tseccuni piccoyepa can'jen fa'e Barrabás, qquen inisecho'cho. Nane Barrabásja tisupaporai'ccu goviernoma iyicca'yepa nasundeccuma joqquitssiañe in'jamba a'lma fi'tti'fa. Tsane indiyepa can'jen'fa. **8**Tsonsi pa'o a'l jipa Pilatoma iñajañe ashaen'fa cuintsu tise fiestanga tson'jen'choma tsoñe. **9**Iñajan'fasi Pilatoja su:

—¿In'jan'fa ti qui ña ccupaye israe'su na'suma?

**10**Nane Pilatoja in'jan Chigama afa'su nasundeccuyi Jesúsma chi'gapa injama'choni se'pipa afe'fa. Tsa'caen in'jamba tsu ya'caen aindeccunga su.

11 Tsa'ma Chigama afa'su nasundeccuja aindeccunga afafaen'fa bove ñotsse Barrabásma ccupaye iñajan'faye. 12 Barrabásma iñajan'fasi Pilatoja iñajampaña:

—Tsama ccupa'ta ¿ma'caen tsoñe qui in'jan'fa israe na'su qquen que'i su'choma?

13 Tsonsi tise'paja fundopa afa'fa:

—¡Avuja'cconga otipa fi'ttija!

14 Pilatoja su:

—¿Jongoesian tsu egaeta tso'an?

Tsa'ma tise'paja ti'tsse fundopa su'fa:

—¡Avuja'cconga otipa fi'ttija!

15 Tsonsi Pilatoja aindeccu tisema chi'ga'fasa'ne in'jamba tise'pa in'jan'cho Barrabásma ccupa. Barrabásma ccupapa Jesúsmajan ma'ppiye manda. Ma'ppi nani'fasi sundarondeccuma manda cuintsu angapa avuja'cconga oti'faye.

16 Tsonsi sundarondeccu Jesúsmá governaror etti'su rande entting'e su cuartonga anga'fa. Tsa cuartoja "pretorio" qquen inisecho'cho. Tseccunga angapa poiyi'cco sundarondeccuma ttu'sesi bo'fa. 17 Tsa'caen bopa Jesús opipa'chonga cu'a sarupai'ccu oppoen'fa. Toya'caen boicco nojama'qque otifaccuve ugapa tisenga otifaen'fa. 18 Tsa'caen tsomba chigambian co'feye ashaen'fa:

—¡Ti'tsse'tsse canseja israe na'su!

19 Qquen supa tise tsovema caofa'ccoi'ccu ochhachha'fa. Tsomba attupoen'fa. Toya'caen tisenga ccarupa na'suma iñajanqquia'caen qquen tsincon'fa. 20 Tsa'caen co'fe nanimba cu'a sarupama oshichchaemba ñoa'me tise ondiccu'jema ondiqquian'fa. Tsa'caen ondiqquiamba avuja'cconga otiye somboen'fa.

### Jesúsmá avuja'cconga oti'fa

(Mt 27.32-44; Lc 23.26-43; Jn 19.17-27)

21 Sombopa jayipa fae tsandie, Simón, tise nasipane jiña'choma cachui'fa. Tsaja Cirene'su a'i, Alejandro yaya tsu. Tise faesu du'shuja Rufo. Tsa'caen cachuipa manda'fa cuintsu Jesús avuja'ccoma opipa angaye.

22 Tsomba Jesúsmá anga'fa Gólgota ccotta'cconga. Gólgota qquenda tsu su tsove tsu'tta. 23 Tseni napipa iñe'sune vinoma mirra seje'pai'ccu eyepupu cui'ña qquen tson'fasi Jesúsja in'jambi. 24 Tsa'caen tsomba Jesúsmá oti'fa avuja'cconga. Oti ccutsiamba tise ondiccu'je'cho sarupama isupa attufaen'fa. Gana qquen co'fe'fa majan jongoesuma isu've'se.

25 Tsa'caen a las nueveqquia'ca'ní Jesúsmá avuja'cconga oti'fa. 26 Jesús tsove omba'ttinga tise egae tsincon'chove su'choma avuja'cconga oti'fa. Qquen tsu tevaen'fa:

Vaja Jesús, israendeccu na'su.

27 Toya'caen Jesúsi'ccu dos ccanganbandeccuma'qque fae'ngae oti'fa. Nane fa'ema avuja'cconga otipa Jesús tansinfanga ccutsian'fa. Faesumajan

Jesús pavefanga ccutsian'fa. <sup>28</sup>Tsa'caen tsu tson'fa Chiga Tevaen'jen suqqua'caen: “Tise'qque te egae tsincon'su.”

<sup>29</sup>Aindeccu majan tsangae panshanjimba Jesúsma camba tisu tsovema fenonomba afase'fa qquen supa:

—¡Ja! Queja Chiga ettima osaemba tres a'tangae ccase ñoñañe qquen su'chota <sup>30</sup>¡tisuma ccushaemba avuja'cco'ye andea!

<sup>31</sup>Toya'caen Chigama afa'su nasundecu, Chiga manda'choma atesiansundeccu'qque tsa'caen tisema afasepa su: “Cca'imajan ccushaen. Tsa'ma tisuma ccushaeñe oshambi. <sup>32</sup>Tiseja Cristo, israe'su na'su, qquen tsu su. Tise ja'ño avuja'cco'ye andesi atte'ta gi tise've in'jan'faya.”

Toya'caen Jesúsi'ccu pporotsse avuja'cco'ni dusesundeccu'qque tisema afase'fa.

### Jesúsja pa

(Mt 27.45-56; Lc 23.44-49; Jn 19.28-30)

<sup>33</sup>Enttinge a'ta pa'cco ande'ye tsu sintsse coseqquia'ca'en da. Sintsse dapa ondusesi ccase coe'jeja de. <sup>34</sup>Tayo ondusesi Jesúsja fundondo'e afapa su:

—Elí, Elí, ¿lema sabactani? —qquen tsu su: Na Chiga, ña Chiga, ¿jongoesie qui ñama cati'je?

<sup>35</sup>Majan tse'tti ccutsusundeccu tise su'choma pañamba su'fa:

—Tiseja Chiga Aya'fama afa'su Elíasve tsu ttuse'je.

<sup>36</sup>Tse'faei'ccuyi fa'e tse'tti'su buttopa chanchanchan'choa'nga inzatssia vinoma tssipoemba canttini'cconga ejiamba Jesús aya'fanga canjaen'fa. Tsa'ma cca'indeccu ja su'fa:

—Cuïntsu antteja. Jingé ron'dapa atteye ma'caen Elías tisema ccushaen'me'se.

<sup>37</sup>Tsonsi Jesús ccase fundondo'e afapa pa. <sup>38</sup>Tise pasi tse'faei'ccuyi Chiga etti'su Chigai'ccu cachuicco'je'cho cuartoma picco'je'cho sarupa'qque chittain ja. Sefane chitta ashaemba andepaningae chittain ja. <sup>39</sup>Sundaro capitán tse'tti Jesúsma can ccutsu'su Jesús ma'caen fundopa pa'choma attepa qquen su:

—Va tsandieja ñoa'me Chiga Dutssi'ye tsu.

<sup>40</sup>Toya'caen majan pushesundeccu biane can'boen ccutsu'fa. Tise'pa'su tsu María Magdalena, Salomé, faesu María -tsa Santiago chu'ambe, toya'caen Josémbé mama. <sup>41</sup>Nane tsendeccu Jesús Galileani jacansi fae'ngae jaca'n'fa. Jacamba fuitecan'fa. Toya'caen faesu pushesundeccu, Jesúsi'ccu Jerusaléni ji'chondeccu, can'boen ccutsu'fa.

### Jesúsma a'tu'fa

(Mt 27.57-61; Lc 23.50-56; Jn 19.38-42)

<sup>42</sup>Tsonsi tayo sime dasi tsa a'ta pa'ccoma ñoñaña'cho a'ta, sema'ma'qquia a'tave napijisi <sup>43</sup>José, Arimatea canqque'su a'lí ji. Tsaja israe nasundecu bo'fa'cho'su. Tiseja ño'amba Chiga tise aindeccuma mandaya'cho a'tave tsu ronda'je. Tsa'camba dyombel'i Pilatonga japa Jesús ai'vove iñajan. <sup>44</sup>Tsonsi Pilatojo “¿Tayo ti pa?” qquen asil'ttaemba capitáma ttu'sepa iñajampaña:

—¿Tayo ti pa Jesúsja?  
 Qquen susi <sup>45</sup>capitánjan su:  
 —Ju, tayo tsu pa.

Tayo pa qquen pañamba Pilatoja manda Jesús ai'voma cuintsu Josénga afeye. <sup>46</sup>Afesi José ñotssia tototssia sarupama chavapa Jesús ai'voma avujacco'ye andiamba findi. Findipa fattocco changove ñoña'cho atu'ttinga a'tu. Tsomba rande patuma mutsinoemba chango sombo'ttima picco. <sup>47</sup>María Magdalena, faesu María –tsa José mama– ma'ttinga a'tu'choma atte'fa.

**Jesúsja ccase qquendya**  
*(Mt 28.1-10; Lc 24.1-12; Jn 20.1-10)*

**16** <sup>1</sup>Sema'ma'qquia a'ta pasasi María Magdalena, Salomé, faesu María –tsa Santiago mama– ñome'bama chava'fa japa Jesús ai'voma onjoeña'chove. <sup>2</sup>Cosepa sinte, faesu avujaquive a'tasi atu'ttinga ja'fa. Chiga tseyi dejíni napipa <sup>3</sup>tisupapora su'je'fa:

—¿Majanda sombo'ttima patu randei'ccu picco'choma joqquitssiaña? Ingija osha'faya'bi.

<sup>4</sup>Tsa'ma tsa'caen su'jettie atu'ttinima camba atte'fa tsa rande patuma tayo joqquitssian'choma. <sup>5</sup>Tsa'cansi ai'yembe ca'nimba chu'a tsandiema attepa dyo'fa. Nane tsaja bia'a totoa ondiccu'jema ondiccu'chopa atu'tti tansinfani dyai. <sup>6</sup>Dyo'fasi tsandieja tise'pama su:

—Dyombe can'faja. In'jan gi que'ija avuja'cconga fi'tti'fa'cho Jesúsve qui ttattacan'fa. Tsa'ma tiseja ccase qquendya. Va'ttija me'i'on. Jipa tise ccui'ttima can'faja. <sup>7</sup>Can'gipa japa tisema shondosundecungu, Pedronga'qque conda'faja: Ccase qquendyapa tise tayoe suqquia'caen que'imá o'tie tsu Galileani jaya. Tseni japa qui tisema atte'faya.

<sup>8</sup>Tsa'caen susi pushesundecuju atu'ttie sombopa buttopa jaja'fa. Nane ttun'dundu'je'e dyopa majangayi'qque conda'fambi.

**Jesúsja María Magdalenanga attian**  
*(Jn 20.11-18)*

<sup>9</sup>Jesúsja cuna avujaquive a'ta ji'ni qquendyapa o'tie María Magdalenanga attian, tise siete cocoyave joqquitssian'chonga. <sup>10</sup>Tsaja Jesúsma tsa'caen attepa ja Jesúsi'ccu jacansundecunga condaseye. Tsendecuju ñombi'yepa ina'jen'fa'ni jipa condase. <sup>11</sup>Tsa'ma Jesúsja canse, María tisema atte qquen susi paña'ma in'jan'fambi.

**Jesús tsaiqui'ye attian'cho**  
*(Lc 24.13-35)*

<sup>12</sup>Tsomba ccase Jesús ccaningae attian, dos a'l, tsaiqui'ye jayi'fa'chonga. <sup>13</sup>Tsendecuju, Jesús tsu, qquen in'jamba toequi ja'fa cca'indeccunga condaye. Tsa'ma japa condase'fasi shondosundecuju tise'pama'qque paña'fambi.

**Jesús tisema once shondosundeczunga attiamba manda**  
*(Mt 28.16-20; Lc 24.36-49; Jn 20.19-23)*

<sup>14</sup>Tsomba omboe Jesúsja tisema once shondosundeczunga attian mesani an dyai'fa'chonga. Tsa'caen attiamba tise'pa in'jan'fambi'choane iyu'u. Nane cca'i attepa, “tayo qquendya” qquen conda'fasi injama'cho shacapa in'jan'fambi'choane tise'pama iyu'u. <sup>15</sup>Tsomba su:

—Poi andenga japa va ccushaya'chone ñotsse condase'choma poiy'cco a'linga candusian'faja. <sup>16</sup>Majan va ñotsse condase'choma in'jamba fetiye'chota ccushaya'cho. Tsa'ma majan in'jambi'choa'ta catiyeya'cho. <sup>17</sup>Toya'caen va canjaen'chota tsu fuiteya majan ñame in'jan'fa'choma: ña inisema afapa tsu cocoyama joqquitssian'faya; faesu aya'fangae'qque tsu afa'faya; <sup>18</sup>iyoma tivei'ccu indi'ni'qque tisema sinttuya'bi; paqque'su seje'pama cu'l'i'a'lqque paji'suve daya'bi; toya'caen pajisundeccum tivei'ccu pporae'ninda ccusha'faya.

**Jesús sefacconi ja**  
*(Lc 24.50-53; Tson 1.6-11)*

<sup>19</sup>Pan tsa'caen afa nanimba Na'su Jesúsja Chiga sefacconi ansunde. Ansundepa ñoa'me na'suve dapa Chiga tansinfanga dyai. <sup>20</sup>Tsa'caen jasi tisema shondosundeccu poi andenga japa ccushaya'chone ñotsse condase'choma candusian'fa. Tsa'caen candusiansi Na'su Jesús tise'pama fuite. Nane sefacconi'su canjaen'choma attian tise'pa su'cho ñoa'me Chiga su'cho qquen canjaeñe.

Tsangaeyi.